

REPUBLIKA E KOSOVËS - REPUBLIKA KOSOVO
KOMUNA E VUSHTRRIË-OPËSTINA VUÇITRN

Nr. / Br. 13250126

Nr. i fq. / Br. st. - 25 -

Data: / Datum: 31.03.2026

VUSHTRRI - VUÇITRN



Republika e Kosovës
Republika Kosova – Republic of Kosovo
Komuna e Vushtrrisë
Opština Vuçitrn – Municipality of Vushtrri



Kuvendi i Komunës

01. Nr. PB-56/26 31/03/2026

PROCESVERBAL
NGA MBLEDHJA E RREGULLT E KUVENDIT TË KOMUNËS SË VUSHTRRIË,
MBAJTUR MË: 26 SHKURT 2026

Mbledhja është mbajtur në sallën e Kuvendit të Komunës së Vushtrrisë, duke filluar në ora 10:10.

Në këtë mbledhje ishin të pranishëm anëtarët e Kuvendit të Komunës së Vushtrrisë si: Behar Duraku, Berat Sadiku, Betim Grabanica, Blerina Shala, Diellza Pllana, Drita Dibrani, Edmond Hyseni, Fakete Dushi, Fatmire Cecelia, Fidan Bejta, Gentiana Rama, Gresa Muli, Hava Mlinaku, Isak Uka, Kushtrim Hyseni, Kushtrim Veseli, Leonora Gërguri, Lorik Maxhuni, Mek Selaci, Melihate Basholli – Latifi, Mensur Kastrati, Mentor Ferizi, Nasuf Aliu, Ramadan Parduzi, Refik Maloku, Rrahim Ajeti, Stefan Markovic, Vlerë Tahiri, Xhon Gubetini dhe Ymer Haradinaj.

Mungoi: Pëllumb Maliqi.

Të pranishëm në këtë mbledhje ishin edhe Kryetari i Komunës z. Ferit Idrizi, përfaqësuesit e MAPL-së, përfaqësuesi i KFOR-it, përfaqësuesi i OSBE-së, përfaqësues të mediave të shkruara dhe elektronike, përfaqësues të shoqërisë civile.

Mbledhjen e hapi dhe e kryesoi Melihate Basholli-Latifi, - Kryesuese e Kuvendit, e cila konstatoi se në sallë janë prezentë 30 anëtarë të kuvendit, kuorum i plotë për zhvillimin e punimeve të mbledhjes plenare dhe për marrje të vendimeve të plotfuqishme, andaj procedoi me rendin e ditës.

Melihate Basholli-Latifi, kryesuese e kuvendit-pasi konstatoi kuorumin, ceku se materialet për të gjitha pikat e rendit të ditës janë dorëzuar sipas afateve ligjore, kërkoi nga anëtari i kuvendit z. Ramadan Parduzi, që të prononcohet para kuvendit lidhur me pozitën e tij si anëtar i kuvendit, pasi që i njëjti ka dorëzuar një dorëheqje te kryesuesja e kuvendit, nga pozita e anëtari të kuvendit, por që më pas ai nuk ka vazhduar me plotësimin e procedurës para KKZ-së për zëvendësimin e tij. Po ashtu ajo kërkoi nga të gjithë ata anëtarë të kuvendit që pozitën e tyre bien ndesh me ligjin dhe që kanë konflikt interesi, të deklarohen se cilën nga pozitën do ta mbajnë, ashtu që të shmangët konflikti i interesit; dhe njoftoi se për të gjitha këto, përgjegjësinë e mban secili që identifikohet se ka vepruar në kundërshtim me ligjin. Po ashtu, ajo përsërit se për të gjithë këta anëtarë që mbajnë edhe një pozitë tjetër, që bien ndesh me ligjin, pasojat do t'i bartin vetë ata.

Refik Maloku, anëtar i kuvendit-në adresimin e tij para qytetarëve dhe Kuvendit të Komunës, deklaroi se: pas konstituimit dhe konsolidimit të institucioneve lokale një gjë mund ta konstatojmë

lirisht se është mandati i ri për Kryetarin, por Kryetari dhe logjika e tij qeverisëse, po ajo e vjetra. Metodatat janë të njëjta, strategjia është e njëjtë dhe qëllimet janë të njëjta.

Duke marrë për bazë përbërjen e Kuvendit, aktualisht Kryetari i Komunës e ka shumicën e thjesht për vendimmarrje. Por, edhe përkundër kësaj, Kryetari e di se këta numra në disa situata nuk i kryejnë punë, kur ka pika dhe projekte që nuk janë në interes të përgjithshëm, prandaj ai pretendon të kontrabandoi deputetë edhe nga opozita, sikur se ndodhi edhe në seancën e kaluar kur LDK-së iu imponua përfaqësuesi në KPF nga ana e PDK-së, dhe kjo pa kurrfarë morali politik. Kjo është strategji e Kryetarit Idrizi dhe PDK-së, dhe kështu ka funksionuar edhe katër vitet e kaluara, duke imponuar agjenda për partitë opozitare pa kurrfarë morali politik e njerëzorë. Tutje vlerësoi se ai, Kryetari i Komunës, mendon se me këto forma arrinë ndonjë përfitim duke marrë një asambleist, por po harron se për t'u bërë asambleist nevojiten 300 vota, ndërsa për tu bërë Kryetar Komune nevojiten 15,000.00 vota dhe kjo i bie se mëkatet e kryetarit janë 50 fish më të mëdha. Sa i përket ekzekutivit apo drejtorive komunale ato mund t'i ndajmë në tri kategori, e para janë ato drejtori dhe drejtorë të cilëve iu ka premtuar Kryetari i Komunës se do t'iu jep diçka në këmbim të mbështetjes në zgjedhje dhe të njëjtat janë pa kurrfarë funksioni. Kategoria e dytë e drejtorive komunale është thjeshtë përmbushje e interesave partiake, duke shfrytëzuar për punësime të militantëve partiak. Dhe e treta, dhe më rëndësishmja është, rrjeta e drejtorive për interesa madhore personale, kupola ku përfshihen dhënia e tenderëve milionësh, dhënia e pronës komunale, dhe lejet e ndërtimit për rrethin e oligarkëve. Kjo ka ndodhur dhe do të ndodh edhe këtë mandat, prandaj shumica prej nesh do të votojnë për një interes të vogël personal, ndërsa interesat e mëdha do t'i realizojnë një grup i vogël i njerëzve të pushtetit aktual. Ai në fund apeloj te të gjithë, që të thirrën mendjes dhe mos të votojnë sy mbyllur.

Ymer Haradinaj, anëtar i kuvendit-pasi i përshëndeti gjithë të pranishmit, i uroj besimtarët e fesë islame për muajin e shenjt të ramazanit, duke ju uruar agjërim të lehtë e të pranuar. Pastaj ai ndër të tjera deklaroi se shqetësimi kryesor i yni dhe i shumë qytetarëve të komunës është vendimi i NPL. "Përparimi" për ndërprerjen e mbledhjes së mbeturinave në disa fshatra të Komunës së Vushtrrisë, si në Gllavotin, Bivolak, Strofc, Zhilivodë, Beçiq, Dubofc, Galicë duke përshirë edhe disa pjesë të qytetit. NPL. "Përparimi" ka bërë të ditur se do të merren masa ligjore për inkasim, përshirë edhe aplikimin e kamatave. Ai konsideron se kjo situatë ka ardhur si pasojë e menaxhimit të dobët nga menaxhmenti i kësaj ndërmarrje, të cilët për vite të tëra qytetarëve nuk iu kanë dërguar faturat për të bërë pagesat e borxheve për shërbimet për mbledhjen e mbeturinave, si pasojë e kësaj ka ardhur deri te situata e rritjes dhe grumbullimit të këtyre borxheve. Ai kërkoi nga Komuna e Vushtrrisë dhe NPL. "Përparimi", të mos aplikoi kamata ndëshkuese ndaj qytetarëve, të bëhet ri-programimi i borxheve, ashtu që qytetarëve të i'u mundësohet pagesa me këste e këtyre borxheve ndaj kompanisë. Po ashtu qytetarëve t'iu dërgohet së paku tri herë në vit fatura e borxheve dhe t'iu mundësohet pagesa online e këtyre faturave, që për momentin nuk është e mundur si pasojë e punës së dobët të menxhmentit të kësaj ndërmarrje dhe autoriteteve komunale. Kërkoj të bëhet saknimi gjendje faktike në terren i ekonomive familjare, sepse shumë familje tash më nuk jetojnë në fshatrat e përmendura, dhe edhe përkundër kësaj atyre u janë akumuluar borxhet për vitet për të cilat ata nuk kanë jetuar në ato vendbanime. Të mos ndëshkohet i tërë fshati apo lagjia, me mos grumbullim të mbeturinave, për shkak të individëve, sepse kjo do të sillte rrezik për grumbullim të deponive ilegale të mbetjeve dhe për pasojë do të kontaminim të ambientit ku jetojmë. Në fund kërkoj që në njërën nga seancat e ardhshme të silltet për plotësim-ndryshim rregullorja për menaxhimin e mbeturinave sepse është identifikuar se ka zbrazëtira dhe ajo duhet t'i përshtatet rrethanave të kohës.

Ramadan Parduzi, anëtar i kuvendit-adresi një kërkesë e cila ishte parashtruar më herët, me datën 26.12.2025, për ndërtimin e “Kullës së Hazir Gjakës”, Komandantë i Batalionit të IV dhe po ashtu luftëtar i Shaban Polluzhës. Prandaj ne si Komunë duhet ta mbështesim dhe realizojmë këtë kërkesë për disa arsye të fuqishme. Së pari, kjo është një çështje e respektit institucional të figurave që kanë kontribuar dhe sakrifikuar për lirinë e Kosovës. Andaj, nderimi i tyre është detyrim moral e kombëtar. Po ashtu, nderimi i kësaj kulle i shërben investimit në ruajtjen dhe kultivimin e trashëgimisë sonë historike e kombëtare. Në projekt i tillë do të shërbente si pikë referimi për brezat e ri, në ruajtjen e kujtesës kolektive. Ndërtimi i kësaj kulle në Ashlanin heroik, do të provonte përkushtimin institucional në ruajtjen e trashëgimisë historike dhe jetësimin e dëshmive të luftës së lavdishme të Ushtrisë Çlirimtare të Kosovës. Prandaj, në këtë kontekst vlerësoi se financimi i kësaj kërkesë jo vetëm që është i arsyeshëm por edhe i domosdoshëm për të ruajtur vlerat tona historike e kombëtare dhe për ta mbajtur gjallë lidhjen mes institucioneve dhe komunitetit. Po ashtu, ai ngriti shqetësimin e tij se nga drejtoresha e DKA-së kemi një qasje diskriminuese për Shkollën SHMU 1, sepse në këtë shkollë nuk është bërë shkurtimi i orëve të mësimin për 5 minuta, sikur në gjitha shkollat, për nder të muajit të shenjët të Ramazanit.

Drita Dibrani, anëtare e kuvendit- pasi i përshëndeti të pranishmit, vlerësoi se përpara se të kalojmë në pikat e rendit të ditës, kam një kërkesë për sqarim që ndërlidhet me transparencën dhe menaxhimin e parasë publike në komunën tonë. Së fundmi, jemi njoftuar për një "super-transfer" në stafin tuaj këshillues – një ekspert që buxhetit të Vushtrrisë i ka kushtuar rreth 26 mijë euro. Edhe pse shifra të bën të mendosh për ndonjë talent ndërkombëtar, bëhet fjalë për z. Fehmi Shala, i cili, përtej ekspertizës, rezulton të jetë edhe familjar i juaji (vëllai i bashkëshortes). Duke qenë se procesi i prokurimit u mbyll pa konkurrencë, qytetarët e Vushtrrisë më kanë ngarkuar t'ju drejtoj këto pyetje specifike: Përvojat në Dumnicë, duke pasur parasysh angazhimin e tij si ekspert për fshatrat, a ju ka ofruar këshilltari juaj ndonjë raport apo leksion mbi përvojat e tij specifike në fshatin Dumnicë, veçanërisht mbi veprimtarinë e tij gjatë periudhës së luftës në këtë zonë? "Suksesi" në Prelluzhë dhe Gracë, duke parë rezultatin tuaj mbresëlënës prej 96% të votave në Prelluzhë gjatë balotazhit, a mund të na thoni, sa i atribuohet ky sukses "shkencës" së këshilltarit tuaj të ri dhe sa koordinimit me Listën Serbe në atë zonë? Këshillat e pranuar, cilat janë konkretisht tri këshillat kryesore që keni pranuar nga ky ekspert deri më sot, të cilat do të arsyetonin pagën e tij prej 26 mijë eurove në sytë e taksapaguesve Vushtrrias? Kryetar, qytetarët presin të dinë nëse këto 26 mijë euro janë investim për zhvillimin e fshatrave, apo thjesht një "bonus" familjar për meritokraci elektorale?!

Berat Sadiku, anëtar i kuvendit- pasi i përshëndeti gjithë të pranishmit i uroj besimtarët e fesë islame për muajin e shenjët të ramazanit, duke uruar agjërim të lehtë e të pranuar. Ai ngriti disa shqetësime për në lagjen te rr. "Shote Galica", nxënësit kalojnë rrugën magjistrale për të shkuar në shkollën "Mustafë Venhari" dhe në javën e kaluar ka pasur një incident. Më tej në rrugën magjistrale Prishtinë-Mitrovicë, konkretisht tek autolarja "Kaltërina" është hapur një gropë e madhe nga një ndërtues, në ç'rast ajo gropë për shkak të shembjeve është duke e rrezikuar një ndërtesë që është aty afër ngjitur, por fatmirësisht deri tani nuk kemi pasur ndonjë incident apo viktimë.

Ai shprehu habinë e tij se për këtë rast nuk kemi reagim nga ana e Drejtorisë së Inspektimeve në Vushtri, as në të kaluarën edhe as tani. Aty pari shihen disa shirita të kuq që i janë vënë, por veprime nuk ka dhe aty pran kalojnë edhe fëmijët që parqet një rrezik të lartë. Gjendja e këtij rasti është se aty nuk kemi as kushte ndërtimore dhe as leje të ndërtimit dhe nuk e dimë se si është hapur

kjo gropë, sepse në këso konditash nuk është dashur as të mendohet e lëre më të fillohet të hapen gropa për ndërtim. Po ashtu, ai shprehu vërejtje për mos-transparencë dhe llogaridhënien kur drejtorët komunal nuk marrin pjesë në mbledhjet e kuvendit. Po ashtu jemi në dijeni se javën e kaluar Drejtorit për pronë z. Bedri Dobra i është shpallur një aktakuzë dhe nuk kemi kurrfarë veprimi nga ana e Kryetarit të Komunës, lidhur me këtë rast.

Fatmire Cecelia, anëtare e kuvendit- pasi i përshëndeti gjithë të pranishmit, ceku se sikurse parafolësi i saj, ka dy çështje pothuajse të natyrës së njëjtë me i ngritur këtu para kuvendit. Çështja e parë të cilën po dua me ngritë është sa i përket kontratave me shërbime të veçanta që janë kontraktuar nga Drejtoria e Prokurimit. Konkretisht kërkoj nga personi që keni kontraktuar për shërbime në kulturë, po kërkoj nga personi që tashmë është punësuar në këtë pozitë, kontratën me të cilën çka parashihet me punuar ai person, a ka zyre konkretisht edhe a vjen ndonjëherë në punë, dhe planin e punës së saj duhet me sjellë këtu para nesh, se me çka ka të bëjë për tre vite meqenëse dhe ajo do të paguhet me një shumë të majme, për tre vite e ardhshme, diku 25.000 € me kontratë me shërbime të veçanta.

Çështja tjetër është e njëjta me atë të z. Berati. Unë jam takuar me banorët përreth, ndërtesa ku është hapur ajo gropë dhe kërkesat e banorëve është e njëjta situatë kur ka rrëshqitje të dheut dhe fatmirësisht falë Zotit s'ka pasur pasoja në njerëz. Kërkoj të bëhet e ditur a ka leje, a ka pasur leje kur e ka bërë gropën, kur e ka hapur domethënë gropën për ndërtim, a ka pasur ndonjë pëlqim për leje ndërtimore si dhe a ka pas leje për rrënimin e atyre objekteve përreth, dhe konkretisht aty ku është tashmë gropa që po e cekin edhe banorët, kanë kërkuar me sa ajo ka informata, një takim për të diskutuar për mbylljen e asaj grope sa më shpejt që është e mundur, por jo me mbeturina dhe mbetje betoni siç ka filluar por duhet të mbulohet me dhe. Në të kundërtën të gjitha shtëpitë që janë për rreth kanë puseta dhe kanë frikën që do të kontaminohet edhe ujë i pijshëm i atyre shtëpive aty në atë lokalitet. Ajo shprehu se është shumë me rëndësi që ajo gropë me u mbyll me dhe jo me mbetje të betonit dhe me mbeturina por me u mbuluar dhe mbyllur me dhe.

Ferit Idrizi, Kryetar i Komunës- të nderuar anëtarë të Kuvendit, drejtorë komunal, përfaqësues të mediave e shoqërisë civile, përfaqësues të KFORIT, të dashur qytetarë të Vushtrrisë, në këtë rast dëshiroj të i bashkohen urimit për muajin e shenjtë të ramazanit, duke ju dëshiruar agjërim të lehtë dhe të pranueshëm të gjithë atyre që agjërojnë. Tutje ai u përgjigj në çështjet e ngritura nga anëtarët e kuvendit.

Sa i përket pyetjes së parë për menaxhimin e mbeturinave, sigurisht që informatën nuk e keni të plotë, sepse nuk janë ndëshkuar të gjithë qytetarët duke mos ofruar shërbimin e mbledhjes së mbeturinave, por ata të cilët nuk e kanë bërë pagesën e mbeturinave dhe deklaroj se asnjëherë nuk janë menaxhuar mbeturinat më mirë dhe ambienti ska qenë më i pastër sesa prej që e kemi marrë menaxhimin komunal përmes Kompanisë "Përparimi". Të gjitha shërbimet janë duke u kryer, andaj, ato shërbime duhet të paguhen. Është një taksë, mendoj e përballueshme. E përballueshme po them sepse është 6 € në muaj, derisa vetëm për mirëmbajtjet e banesave kushton më shumë. Dhe në bazë të asaj që kemi hulumtuar tregun, këtu, në komunën e Vushtrrisë, qytetarët paguajnë 13 € në muaj për mirëmbajtjen e pastërtisë së banesave të tyre. Këta punëtorët e Përparimit, duhet me i paguar edhe me ju rrit pagat. Veç e kemi bërë një rritje në start dhe do të vazhdojmë ashtu qysh ju kam premtuar, sepse rreziku është që nesër kemi me mbet edhe pa këta punëtorë, që janë kategoria që më së shumti punojnë, janë kategoria më e ndjeshme dhe nëse ne si kuvendarë për një hatër të dikujt që s'i ka paguar mbeturinat, ndalemi edhe flasim këtu se na kanë mbetur qytetarët aq keq, mendoj që ju hymë në hak tash kësaj kategorisë tjetër që për çdo ditë e shohim qytetin e pastër, i shohim tu i pastruar mbeturinat.

Sa i përket çështjes së faturave të mbeturinave, informata ju ka shkuar me kohë secilit qytetarë edhe mbeturinat duhet të paguhen, përndryshe ndërmarrija nuk mund të funksionoi. Të gjithë këtu duhet me qenë në një mendim se edhe mediat më kanë pyetur për kushërinjtë e mi, ata si i kanë paguar?! – por kjo nuk ka të bëjë me lidhje farefisnore të njerëzve, kjo është domethënë: i paguan mbeturinat, kryhet shërbimi.

Ju e dini të gjithë, që krejt çka jetojnë me asistencë sociale i kemi liruar prej obligimeve të pagesës së mbeturinave, pra i ka paguar komuna. Andaj, nuk kemi mundësi që edhe kategori të tjera t'i lirojmë.

Sa i përket çështjes së kullës së “Hazir Gjakës”, kjo duhet të futet në planifikim të buxhetit. Po sa të vijmë dy qarkoret buxhetore. Nëse ti do jesh anëtar i kuvendit, tash ke me zgjedh njërin prej tyre, ose me qenë anëtar ose ke me qenë mësimdhënës. Nëse je anëtar i kuvendit, na vijmë dy qarkoret buxhetore të cilat do i diskutojmë bashkërisht edhe planifikimin e buxhetit e bëjmë, dhe ky projekt futet në planifikim buxhetor. Edhe unë jam që ato monumentet e trashëgimisë kulturore gjithsesi të kultivohen sepse pasurohet historia jonë. Ndërkaq sa i përket shkurtimit të orarit, unë nuk po e lë drejtoreshën hiç me dalë me marrë kohën, veç po tregoj se, Ministria e Arsimit, Shkencës, Teknologjisë dhe Inovacionit, është i vetmi autoritet që ka të drejtë me bë ndërhyrje në kurrikula, por edhe në orarin mësimor. Asnjë shkollë nuk e kemi lejuar në mënyrë zyrtare as me shkrim dhe as me vendim të drejtoreshës, që të ndërhyj në shkurtimin e orarit të mësimin për shkak të muajit të shenjt të ramazanit; dhe shkollat në saje të autonomisë së tyre që e kanë, kanë vepruar.

Pastaj, duke ju referuar diskutimit të anëtares së kuvendit Drita Dibrani, vlerësoj: fillo ndërtoje një karrierë të mirë politike dhe largoje gjuhën helmuese sepse ti nuk e di së pari sa anëtarë të familjes unë i kam dhënë për këtë liri që e gëzojmë sot. Besoj që nuk e dinë edhe cilët janë ata edhe ku kam qenë unë në atë periudhë edhe çfarë kontributi kam dhënë unë. Nuk po dua tash me i promovuar vlerat e mija se kurrë në jetë nuk e kam bërë një veprim të tillë. Po të drejtohem kështu në mënyrë humane. Sa i përket këtij rastit të konsulentëve, ne si Komuna jemi të hendikepuar, sepse një ministër i ka 8-të këshilltarë. Një Kryetar Komune e ka një shef kabinetit, një vozitës dhe një asistent personal. Normalisht që ato pika ku kemi pasur ngecje kemi shpallë vende për konsulent dhe kjo është e ligjshme. Kanë qenë procedurat e tenderimit, kemi pasur të drejtë, kanë qenë kriteret e përzgjedhjes, edhe ka pasur të drejtë secili të aplikoi. Tutje shtoj se nuk është e ndershme, të thuash një njeriu që prej fillimeve të para i ka shërbyer këtij vendi. Edhe në kohën kur mësimi mbahej nëpër podrum, unë i kam mësuar dhe kam organizuar arsimin shqip edhe jam kanë pjesë e solidaritetit në vitet 90, kurrë nuk jam ndalë. E kur ka ardhur momenti me dalë me mbrojt atdheun jam vetë i katërt vëlla si pjesëmarrës në luftë dhe po ashtu kam gjashtë anëtarë të familjes të vrarë në luftën fundit. Prandaj atë fjalinë që e përmende mos e përmend më se je e re, e ndërton një karrierë, nuk i dihet jetës hiç, nuk i dihet ku ka me të përfunduar karriera jote. Më mirë ndërtoje një karrierë të mirë, se unë katër vjet jam Kryetar Komune. Një anëtar i kuvendit nuk del me thënë më ka ofenduar Kryetari. Prandaj, nuk është e ndershme.

Lidhur me problemin që e ngriti anëtari i kuvendit z. Berat Sadiku, ceku se e ndan shqetësimin plotësisht me të, për atë gropë që është hapur. Dhe për Zotin, kam qenë i shokuar kur e kam parë në atë gjendje. Ai nuk dëshiron t'i ikë përgjegjësisë, por kjo lëndë është dërguar në prokurori. Personi që e ka hapur atë gropë ka qenë drejtor i ish-Kryetarit të Komunës z. Xhafer Tahirit, koleg i z. Berat Sadiku. Ne ju kemi thënë nga frika, nga rreziku i shembjes, të gjuhet material, ashtu që ajo gropë të mbyllet. Pastaj, njoftoi se iu ka premtuar banorëve që ajo gropë do të mbyllet, dhe sqaroi se këtë çështje e ka denoncuar në polici dhe në prokurori dhe ata duhet të veprojnë. Unë nuk qëndroj mbrapa saj.

Lidhur me komentet e z. Refik Maloku, anëtar i kuvendit, vlerësoj se kanë rrugëtuar bashkë veç se deklaroi se është njeri që i pranon kritikën, por ky i fundit shihet se është i mllëfosur, dhe ceku se nuk ka faj që të ka mundur në zgjedhje në fshatin e tij Samadrexhë. Sepse i'u ka shërbyer atyre qytetarëve edhe ata e respektojnë shumë, sepse katër vjet i ke lënë pa ujë të pijes banorët e fshatrave në Samadrexhë, Vilanc, Ropicë, nuk e ke lënë asnjë gjurmë të punës suaj. Më tej parkingut nëntokësor dikur e vlerësoje si gropa e "Hajdin Sejdiut" por po del që nuk është ashtu e mos t'i përmendi shumë e shumë projekte, prandaj nuk kam faj unë sa më drejt i kam marrë votat dhe se qytetarët e respektojnë. Edhe unë jam i gatshëm secilit qytetar me i kryer shërbim ashtu qysh duhet. Pra, pse unë jam këtu ka qenë vullneti i qytetarëve qysh është kryeministri sot. Unë nuk kam të drejtë tash qytetarëve me ju than ju keni gabuar që i keni votuar 51% që i keni marrë. Se kur po është në pyetje aty po ke qejf. E në anën tjetër me thënë me mua paske gabuar. Domethënë qytetarët kanë vendosur për këtë punë, e kanë mandatin e tyre, juve kam me ju respektuar shumë, kam me u mundu me kontribuar shumë në këtë kuvend, po edhe me zbut këtë gjuhë. Apeloj të ndalet gjuha denigruese në kuvend.

Refik Maloku, anëtar i kuvendit-deklaroi se, Kryetari i Komunës, si zakonisht e luan rolin e një engjëlli kur del këtu edhe fillon e thirret në kohën e kaluar se çka ka kontribuar. E kur u kanë çoban, kur u kanë mësues, kur u kanë ushtar. Ferit Idrizit kurrë emrin s' i kam përmend derisa nuk ka qenë Kryetar Komune. Andaj, unë nuk jam duke fol për Ferit Idrizin, as si mësues, as si ushtar. Jam duke folur për Ferit Idrizin si Kryetar të Komunës, kështu që mos i përziej konceptet. Në kritikën që jemi duke e bërë, jemi duke e bërë në cilësinë e të qenit Kryetar Komune, e jo në cilësi tjetër. Këtu po tentohet të bëhen lojëra duke u shfrytëzuar e kaluara. Kritikën për ty janë si Kryetar, prandaj pyetjet që anëtarja e kuvendi t'i bëri janë plotësisht të drejta dhe për ato pyetje kryetari nuk e dha asnjë përgjigje. Prandaj, Kryetarit i themi që ne jemi duke bërë luftë politike kundër tij d.m.th. me Feritin Kryetar, jo me Feritin ushtar, as mësues, as djali i filanit, kështu që mos e qitni në rrafshin njerëzor këtu, por në rrafshin politik.

Berat Sadiku, anëtar i kuvendit-tha se, ekziston një shqetësim i banorëve edhe i joni si banorë i asaj zone. Për neve, pak rëndësi ka kush është investitori Kryetar, a ka qenë drejtor i LDK-së apo jo. Fakti është që ajo gropë është që tre - katër vjet aty, dhe nuk është ndërmarr asgjë, dhe kjo nuk është në rregull. Shfrytëzimi i asaj zone, rrënim i atyre shtëpive individuale, është filluar gjërmimi pa pasur kushte dhe leje ndërtimore. Ky është shqetësimi jonë.

Ferit Idrizi, Kryetar i Komunës- u zotua se, planin, raportet dhe çdo gjë i ka konsulentin në fjalë, mundesh të kesh qasje, dhe po të njëjtat mund t'i sjellim në seancën e ardhshme.

Pas votimit të kuvendi me 29 vota "për" aprovoj për t'a inkorporuar në rendin ditës Raportin për zbatimin e Planit të Integritetit për vitin 2025.

Drita Dibrani, anëtare e kuvendit- si anëtare e Kuvendit Komunal nga Lëvizja VETËVENDOSJE, në mbështetje të Nenit 18 të Rregullores së Punës, propozoj themelimin e komiteteve të tjera funksionale të Kuvendit, si mekanizma të domosdoshëm për forcimin e llogaridhënies dhe kontrollit demokratik mbi ekzekutivin komunal.

Propozoj themelimin e këtyre komiteteve:

- Komiteti për Arsim, Kulturë, Rini dhe Sport
- Komiteti për Shëndetësi dhe Mirëqenie Sociale
- Komiteti për Zhvillim Ekonomik
- Komiteti për Pronë
- Komiteti për Bujqësi

• Komiteti për Shërbime Publike

Këto komitete nuk janë formalitet. Ato janë instrumente konkrete për të garantuar që secila drejtori të raportojë rregullisht, që secili projekt të monitorohet me seriozitet dhe që çdo euro e buxhetit të shpenzohet me përgjegjësi, në shërbim të qytetarëve. Këto mekanizma tashmë funksionojnë në shumë kuvende komunale në Kosovë dhe kanë dëshmuar se rrisin transparencën, përmirësojnë koordinimin institucional dhe e forcojnë rolin mbikëqyrës të kuvendit. Vushtrria nuk duhet të mbetet prapa në ndërtimin e standardeve të qeverisjes së mirë. Qytetarët tanë presin përgjegjësi, transparencë dhe rezultate konkrete. Kuvendi nuk duhet të jetë vetëm organ votimi, por organ aktiv mbikëqyrës dhe përfaqësues i interesit publik. Prandaj kërkoj që ky propozim të futet në rend dite dhe të procedohet për miratim, në mënyrë që Kuvendi Komunal të ushtrojë plotësisht rolin e tij kushtetues dhe ligjor në shërbim të qytetarëve të Vushtrrisë.

Pas shqyrtimit të rendit të ditës, Kuvendi pas votimit me 29 vota “për” aprovoi këtë:

R E N D I T E

1. Miratimi i procesverbalit nga mbledhja e rregullt e Kuvendit të Komunës së Vushtrrisë, mbajtur më datë 29 janar 2026.
2. Informatë për gjendjen e sigurisë në Komunën e Vushtrrisë, për vitin 2025.
3. Propozim – vendim për ndryshimin dhe plotësimin e vendimit të kuvendit të komunës nr. 01.189/23, datë 28.07.2023.
4. Propozim–vendim për emërimin e delegatëve të Komunës së Vushtrrisë në Kuvendin e përgjithshëm të Asociacionit të Komunave të Kosovës.
5. Informatë për shërbimet shëndetësore për vitin 2025, në Komunën e Vushtrrisë.
6. Informatë lidhur me lejet ndërtimore, kushte ndërtimore dhe leje-rrënimi për vitin 2025.
7. Raporti i sistemit të menaxhimit të performancës për vitin 2024.
8. Raporti për zbatimin e Planit të Integritetit për vitin 2025.
9. Pyetje dhe përgjigje.

1. Miratimi i procesverbalit nga mbledhja e rregullt e Kuvendit të Komunës së Vushtrrisë, mbajtur më datë 29 janar 2026;

Pas shqyrtimit të kësaj pike të rendit të ditës, kuvendi me vota “unanime” miratoi Procesverbalin nga mbledhja e rregullt e Kuvendit të Komunës së Vushtrrisë, mbajtur më datë 29 janar 2026.

2. Informatë për gjendjen e sigurisë në Komunën e Vushtrrisë për vitin 2025;

Fatmire Cecelia, anëtare e kuvendit- e përgëzoj Stacionin Policorë në Vushtrri dhe gjithashtu Komunën e Vushtrrisë, konkretisht Drejtorinë e Arsimit për bashkëpunimin që e ka me stacionin policor dhe komplet komuna e Vushtrrisë. Tutje ajo u ndalë te këto raportimet duke i analizuar dhe uroj që këtë vit të mos kemi vrasje, sepse vitin e kaluar kemi pasur dy vrasje në komunën tonë. Pastaj u ndal te rekomandimet, ku ceku se i ka bërë përshtypje që Stacioni Policor ju ka rekomanduar që me vendosë kamera në hapësirat ku nuk ka kamera, gjë që atyre ja mundëson dhe ja lehtëson punën shumë për me identifikuar vjedhjet, përdoruesit e narkotikëve dhe shtoj se ka po të njëjtin shqetësim, andaj kërkoj që të zbatohen këto rekomandime dhe të

vendosen kamerat në vendet ku ato mungojnë. Tutje shtoj se kohëve të fundi pasi ka munguar ndriçimi publik, si rezultat i mungesës së energjisë eklektike, lagje të caktuara në qytet janë shndërruar në strehë të narkotikëve, kështu që është mirë me vendos sa më shpejt kamerat e sigurisë. Diçka tjetër çka i përket Komunës së Vushtrrisë, që e lehtëson edhe punën e policisë në komunën tonë është Drejtoria e Inspektimeve, është mirë që të gjitha kiosqet që janë përreth shkollës me i kontrolluar më shpesh, sepse fëmijët në afërsi të shkollave po përdorin dhe po blejnë gjëra që nuk janë për moshën e tyre dhe është mirë që me dalë inspektorët me kontrolluar sa më shpesh për të mirët e fëmijëve tanë, për siguri të përbashkët. Në fund, po ashtu përgëzoj edhe njëherë Drejtorinë e Arsimit për bashkëpunim me policinë, ashtu që janë dalë dhe i kanë vendosur policinë te shkolla, gjë që e ka lehtësuar edhe komunikacionin te shkollat.

3. Propozim–vendim për ndryshimin dhe plotësimin e vendimit të kuvendit të komunës nr. 01.189/23, datë 28.07.2023;

Berat Sadiku, anëtar i kuvendit- pyeti sa i përket vendimit lidhur me afatin e tij, dhe shtoi se si grupi kuvendar i Lidhjes Demokratike janë në përkrahje të këtij vendimit?! Ajo çka është për me u diskutuar këtu është vendimi i datës 28.07.2023, kur kjo pronë ju ka dhënë në shfrytëzim Shërbimit Spitalor, Klinik Universitar, me afat prej tre viteve. Në pikën dy, cekët se aty do të ndërtohet edhe parkingu nëntokësor. Nuk e di arsye kryetar, cila ka qenë arsyeja për me jep në shfrytëzim për parking nëntokësor dhe afati për dhënin e pronës në shfrytëzim të jetë vetëm tri vjet. E kemi një vendim këtu tash, për 40 vite. E kam parë projektin Kryetar, është për me i përgëzuar dhe në të njëjtën kohë edhe me i falënderuar Emiratet e Bashkuara e Arabe për investimin në komunën tonë. Shfrytëzimi prej 40 vjet, ndoshta ish dashur me u diskutuar që me jep në fakt për 99 vjet, kur di që edhe herët e kaluara kemi pas raste kur parcela të tilla janë dhënë në shfrytëzim për 99 vjetw. Kështu që unë po besoj që edhe në bazë të kërkesës së Drejtorit të Spitalit të Vushtrrisë nuk është cekur afati, mirëpo ndoshta ne do të duhet ta zgjatim këtë afat si kuvend komunal pasi që ky do të jetë një ndërtim i vrazhdë dhe i përhershëm, të japim afat prej 99 viteve, kur dihet se kemi të bëjmë me një investim të një vlere të konsiderueshme, e që do të ndikon në përmirësimin e kushteve në ofrimin e shërbimeve kualitative shëndetësore.

Gresa Muli, anëtare e kuvendit- fillimisht shfrytëzoi rastin dhe fjalimin e nisi duke uruar secilin besimtar për muajin e shenjë të ramazanit. Ndërsa sa i përket kësaj pikës, ne si Grup Kuvendar e përkrahim dhënien shfrytëzim për shkak që investimi është shumë i madh dhe pajtohet me parafolësin e saj i cili tha që është më mirë me jep këtë pronë në shfrytëzim për 99 vjet, për shkak të investimit edhe ndërtimit që është normalisht i vrazhdë dhe investimit më të madh.

Me këto, propozoj që meqenëse investimi është 6.5 milion edhe kemi një Stacion të Policisë që objekti është i vjetërsuar goxha shumë edhe lokacioni është bërë vështirë i qasshëm për shkak se gjithmonë është rruga e bllokuar e ne si komunë të japim në shfrytëzim edhe parcelën ku është stacioni i policisë dhe për policinë të gjendet një parcelë tjetër ku do ndërtohej një objekt i dinjitetshëm dhe më i përshtatshëm. Ndërsa, investimi që është kaq i madh me qenë hapësira më e gjerë ndoshta jo për me ndërtuar por për një park ose diçka të ngjashme për njerëzit ato që shkojnë kështu që është propozimi për stacionin policor është propozimi i saj personal ndërsa përkrahja për dhënien në shfrytëzim është i grupit tonë kuvendar.

Ferit Idrizi, Kryetar i Komunës- tha se, arsyeja pse e kemi dhënë për tri vjet, është se ky kuvend ka qenë mendoj që diku 80% të kësaj përbërje kanë qenë kur e kanë votuar këtë vendim, dhe arsyeja ka qenë që nuk kemi besuar që fillojnë investimet. Nuk ka qenë me ja dhënë në shfrytëzim për tri vjet, po tri vjet ka qenë afati i fillimit të investimeve. Nëse brenda tri viteve fillon

me automatizëm me ja vazhduar afatin, se e dimë që për tre vite ai investim nuk ja vlen me u bërë dhe tash jemi në këtë momentum ne e kemi negociuar edhe me donatorin.

Përpjekjet tona kanë qenë me nxjerrë sa më shumë investime, por nuk kemi mundur me e nxjerrë parkingun nëntokësor. Është hartuar projekti, na është prezantuar projekti komplet, nëse nuk gabojmë kanë nxjerrë diku 60 vend-parkingje sipërfaqësore. Edhe ato të tjerat investime që kanë me i bërë që vlera u përmend diku afër 6.5 milion euro.

Sa i përket Stacionit Policor, e kemi biseduar me drejtorin e me drejtoreshën regjionale dhe jemi në përpjekje për me gjetë një vend diku tjetër, dhe me ja lëshuar spitalit atë parcelë. Është plotësisht propozim me vend. Po e kemi pasur edhe këtë ide thash, e kemi biseduar dhe nuk kemi akoma një propozim përfundimtar për këtë çështje. Madje kishte propozuar këtë ish-objektin e TMK-së, por ajo nuk i plotësonte standardet, sepse po dashka me pas edhe njëfarë podrumi, për mbajtje 48 orë qysh është e rregulluar me ligj për këtë ata po dëshirojnë të vazhdojmë. Kësaj radhe nuk mendoj që duhet të futet në rend të votohet që t'i jepet ajo, sepse praktikisht e kemi Stacionin Policor edhe e krijojmë një komplikim të panevojshëm. Por, unë po ju premtoj që kam me punuar në këtë drejtim dhe besoj që kemi me ja dalë me gjetë një vend diku edhe është shumë mirë ato me ju dhënë spitalit, me e zgjeruar, se jemi me fat që kemi një spital të tillë në Vushtrri çfarë e kemi. Mendoj që afati 40 vjeçar, pra me mundësi vazhdimi është një afat i mjaftueshëm. 40 vjet nuk janë periudhë e shkurtër për atë investim. Në fund i falënderoj të gjithë për gatishmërinë me mbështet, por besoj që të gjithë keni me mbështet se është interes për të gjithë neve për qytetarët tonë.

Melihate Basholli-Latifi, kryesues e kuvendit- e hedh në votim propozim-vendimin për dhënien në shfrytëzim afatgjatë me afate prej 40 vjet, me mundësi vazhdimi dhe në vendim me u cek që të shërben vetëm për nevojat e spitalit të Vushtrrisë kjo pronë.

Në fund të debatit lidhur me këtë pikë të rendit të ditës kuvendit pas votimit me 30 vota “për” vendosi me sa vijon:

1. Me këtë vendim ndryshohet dhe plotësohet pika 1 e vendimit të Kuvendit të Komunës së Vushtrrisë me numër të protokollit **Nr.01.189/23 i datës 28.07.2023 për dhënien në shfrytëzim afatshkurtër të pronës së paluajtshme të komunës, Shërbimit Spitalor Klinik Universitar të Kosovës, që lidhet me financimin e projektit për ndërtimin e parkingut nëntokësor dhe zgjerimi i hapësirave të shërbimit të emergjencës për nevoja të spitalit të Vushtrrisë në Komunën e Vushtrrisë, ndërsa ndryshimet bëhen si në vijim:**

1.1. Dhënia e pronës komunale parcela kadastrale P-70202016-02358-7 me sipërfaqe prej 7380 m2 ZK – Vushtrri pronë e Komunës së Vushtrrisë e evidentuar në emër PSH. Shtëpi e Shëndetit jepet në shfrytëzim afatgjatë Shërbimit Spitalor Klinik Universitar të Kosovës në afat prej 40 viteve, me mundësi vazhdimi me qëllim të realizimit të projektit ndërtimi dhe zgjerimi i hapësirave të reja spitalore për nevoja e Spitalit “Sheikh Zayed” në Vushtrri.

1.2. Prona e cekur si në pikën 1.1 të këtij vendimi do të shfrytëzohet vetëm për nevojat e Spitalit “Sheikh Zayed” në Vushtrri, nuk lejohet shfrytëzimi për qëllime tjera.

1.3. Në kuadër të pikës 1 të vendimit bazë bëhet ristrukturimi i projekti, ku nuk parashihet ndërtimi i parkingut nëntokësor, por vetëm bëhet zgjerimi i hapësirave të reja spitalore për nevoja të Spitalit “Sheikh Zayed” në Vushtri.

2. Pikat të tjera të vendimit bazë Nr.01.189/23 i datës 28.07.2023 mbeten të pandryshuara.

3. Për zbatimin e këtij vendimi obligohen: Drejtorja për Urbanizëm dhe Mbrojtje të Mjedisit, Drejtorja e Shëndetësisë dhe Drejtorja për Gjeodezi Kadastër dhe Pronë.

4. Ky vendim hynë në fuqi tridhjetë (30) ditë pas regjistrimit në Zyrën e Protokollit të Ministrisë për Administrimin e Pushtetit Lokal, si dhe 7 (shtatë) ditë pas publikimit në faqen zyrtare të Komunës së Vushtrrisë.

4. Propozim–vendim për emërimin e delegatëve të Komunës së Vushtrrisë në Kuvendin e përgjithshëm të Asociacionit të Komunave të Kosovës.

Pas shqyrtimit të kësaj pike të rendit të ditës kuvendit pas votimit me 29 vota “për” vendosi me sa vijon:

1. Me këtë vendim emërtohen anëtarët e kuvendit të Komunës së Vushtrrisë të cilët do ta përfaqësojnë Kuvendin Komunal të Vushtrrisë në Kuvendin e përgjithshëm të Asociacionit të Komunave të Kosovës në përbërjen si në vijim:

1.1. Vlerë Tahiri anëtare e Kuvendit (PDK);

1.2. Refik Maloku, anëtar i Kuvendit (LVV);

1.3. Ramadan Parduzi, anëtar i Kuvendit (LDK).

2. Kryetari i Komunës përfaqëson Komunën e Vushtrrisë sipas detyrës zyrtare me përfaqësim direkt, ndërsa partitë politike të përfaqësuara në Kuvendin e Komunës së Vushtrrisë propozojnë nga një përfaqësues.

3. Anëtarët e emëruar në pikën 1 të këtij vendimi, emërohen me mandat të njëjtë si të anëtarëve të Kuvendit të Komunës së Vushtrrisë.

4. Për zbatimin e këtij vendimi obligohen: kryetari i komunës, kryesuesja e kuvendit dhe anëtarët e kuvendit të cekur si në pikën 1 të këtij vendimi.

5. Ky vendim hynë në fuqi tridhjetë (30) ditë pas regjistrimit në Zyrën e Protokollit të Ministrisë për Administrimin e Pushtetit Lokal, si dhe shtatë (7) dite pas publikimit në faqen zyrtare të Komunës së Vushtrrisë.

5. Informatë për shërbimet shëndetësore për vitin 2025 në Komunën e Vushtrrisë;

Fatmire Ceceli, anëtare e kuvendit-tha se, sa i përket informatës së Drejtorisë së Shëndetësisë, e kam lexuar të gjithën. Shumica e këtyre parametrave të këtyre statistikave që kanë ardhur janë të vaksinimit të qendrave Mjekësisë Familjare Sa i përket raportit të shëndetësisë, desha me cekë disa

pika. Pastaj shtoj se edhe në Komitetin për Politikë e Financa ka kërkuar të jetë një raport i Qendrës Rezidenciale në Lumadh, por të njëjtin nuk e keni bashkangjitur, nuk na ka ardhur në email-adresë për mbledhjen e radhës. Tutje u ndal te çështja e laboratorëve, drejtorët me na tregu sa po bëhen analiza në laboratorin e Qendrës Kryesore të Mjekësisë Familjare ku po amputohet gjaku dhe ku po bëhen analizat, me na njoftuar se çfarë parametra të analizave përbëhen edhe me na njoftuar për pajisjet laboratorike që ende nuk janë në funksion. Gjithashtu pyet drejtorin sa i përket biokimistit, në çfarë baze ligjore po i lëshoni këto analiza duke ditur që nuk kemi biokimist fare në Qendrën e Mjekësisë Familjare. Gjithashtu, te Qendra Rezidenciale vlerësoj se është shumë e nevojshme blerja e një veture. E di që është në planifikim. E di që ju ka dështuar disa herë. E di që jua ka marrë buxhetin përmbaruesi. Por, kërkoj nga ana e drejtorit që t'ja siguroni një veturë Qendrës Rezidenciale, meqenëse ka raste të ndjeshme qysh e keni pas rastin e fundit që me të vërtetë ishte rast tepër i rëndë. Pra, ajo apeloj që të sigurohet një veturë në periudhë derisa të përfundon procedura për blerjen e veturës tjetër për Qendrën Rezidenciale. Po ashtu me lidhë një kontratë qysh po kontraktoni shërbime të veçanta për miq, halla e teze dhe për ish bashkë partiakë me kontraktuar një psikolog për shkak se kanë nevojë edhe rezidentët të cilët janë aty, por edhe stafi që në rastin e fundit që ka ndodhur. Ata, me të vërtetë kanë nevojë me u trajtuar dhe të marrin shërbime psikologjike. Kjo vlen edhe për stafin pasi që edhe stafi është në një punë të ndjeshme. E dini shumë mirë të gjithë dhe kërkoj që me pas psikologun. Pse e ngrita më herët çështjen e bashkë-partiakut tuaj kryesuese që kërkonte çka po punon që merr 25.000 € për tre vite, kontratën a ka qenë ndonjëherë në punë konkretisht, ka lidhje me këtë se kur është kontraktuar ajo bashkë partiakja e juaj ish-Drejtoresha e Kulturës, duke i marrë 25.000 € për tre vite pa bërë asnjë punë. Në të njëjtën kontratë u kontraktua edhe një psikiatër për këtë Qendrën Rezidenciale që i kanë marrë 3.000€ edhe kanë bërë shumë punë të vlefshme. Andaj, kjo çfarë ka ngjarë është vërtet hipokrizi, mirëpo është mirë që tash me u mundu me e rregulluar pak këtë çështje në Qendrën Rezidenciale.

Drita Dibrani, anëtare e kuvendit- tha se, sot po shqyrtojmë raportin e shëndetësisë për vitin 2025. Ky dokument është vetëm një tentim i dëshpëruar për të kamufluar realitetin përmes shifrave kumulative. Ju mund të provoni mashtrimin me tabela, por nuk e mashtroni dot qytetarin që nuk i merr shërbimet. Ky raport, vetëm sa vërteton atë që kemi thënë si subjekt politik gjatë tërë vitit. Ju e keni lënë Vushtrinë pa shërbime bazike duke mbyllur laboratorët në QMF 1, QMF 3 dhe në Lumadh, si dhe duke shuar shërbimin stomatologjik në Pantinë. Tentimi për t'i fshehur këto mbyllje nën shifra të përgjithësuara është fyerje për inteligjencën e qytetarëve. Më tregoni i nderuar Kryetar, çfarë po ndodhë me skandalin e pajisjeve në laboratorin e QMF 1, jeni detyruar të dërgoni pajisje nga QKMF-ja, sepse pajisjet e blera mbi 30 mijë euro akoma nuk janë bërë funksionale. Janë blerë me sistem të mbyllur që nuk përputhet me reagentët – një dëm i pastër financiar. Ku mbetën pajisjet prej 5,000 eurosh që ju, bashkë me nënkryetarin Zhegrova dhe ish-drejtorin Rashica, i keni pranuar e paguar? Ky rast duhet të hetohet nga Prokuroria dhe Krimet Ekonomike! Akoma më rënd, sot analizat në Vushtri punohen në kundërshtim flagrant me Ligjin për Shëndetësi. Pacientët në QKMF, te tregu, punktohen dhe ato mostra gjaku transportohen në QMF 1 për t'u punuar. Zotërinj, transporti i gjakut dhe indeve është i ndaluar me ligj! Kush mban përgjegjësi për saktësinë e rezultateve që komprometohen rrugëve nga dridhjet dhe makinat e papërshtatshme? Dhe dështimi vazhdon te parandalimi. Në faqen 31, në raport, shohim se refuzimi i vaksinave te klasat e gjashta ka arritur në 12.59%. Ky është dështim total i fushatave tuaja. Kur prindërit hezitojnë, besimi te ju ka rënë në pikën zero. E si të kenë besim, kur në faqen 34 vetë raporti juaj kërkon 'sigurimin e ujit dhe kanalizimit nëpër shkolla? Pse nuk i keni përfshirë në raport gjobat skandaloze? Dënimin prej 10,000 eurosh për vaksinat e gripit, gjobën e drejtoreshës

së QKMF-së dhe mungesën e kushteve në AMF Ashlan. Ju keni harruar aktakuzat, arrestimet për ryshfet dhe angazhimin e kuadrit nga kriminalistika që nuk parashihet në asnjë rregullore!

Pyetjet dhe kërkesat direkte ishin:

1. z. Drejtor, a mund të na thoni sot emrat e shkollave që nuk kanë furnizim me ujë dhe kanalizim, duke i lënë fëmijët tanë në kushte mesjetare në vitin 2025?
2. Kryetar, ku gjenden pajisjet prej 5,000 erove që i keni paguar dhe pse pajisjet prej 30 mijë eurove nuk punojnë?
3. Kryetar, meqë po na e shisni si sukses këtë sistem, analizat tuaja të fundit laboratorike ku i keni bërë? A i keni bërë në laboratorët tanë ku gjaku "shëtit" rrugëve, apo keni zgjedhur spitalet private në Prishtinë ose keni shkuar në QKUK sepse as ju nuk i besoni këtij sistemi që keni krijuar?
4. Kërkoj publikisht dhe kjo është kërkesë zyrtare, të na i sjellin grupit tonë kuvendar emrat e komisioneve për hartimin e specifikave, komisionet e vlerësimit dhe ato të pranimit të pajisjeve laboratorike që nuk janë futur në funksion për më shumë se dy vite. Nëse nuk më përcillen, do të ndjek hapat ligjorë. Dikush duhet të japë llogari për buxhetin që u dha për pajisje të kota dhe jofunksionale.

Lorik Maxhuni, drejtor i DSHPS-së-paraqiti sqarime të hollësishme lidhur me informatën për shërbimet shëndetësore për vitin 2025 në Komunën e Vushtrrisë, duke u përgjigjur në pyetjet e parafolësës së saj. Tutje shtoi se është jashtëzakonisht krenar për shërbimet që Qendra Kryesore e Mjekësisë Familjare jep në qytetin e Vushtrrisë, nuk mbetet asnjë qytetar pa shërbim. Të gjitha shërbimet që janë në Udhëzimin Administrativ numër 04/2020 për Kujdesin Parësor Shëndetësor, ku jepen në nivelet më të kënaqshme dhe për këtë jemi shumë krenarë për shkak që shëndetësia Vushtrriase në çdo raport të performancës ka qenë në top-komuna të cilat kanë dhënë shërbimin mjekësor. Kisha dashur me u ndal tek anëtarja e kuvendit znj. Fatmire Cecelia, ku ceku se Qendra Rezidenciale nuk është përfshirë në raportin e shëndetësisë për shkak që është dhe menaxhohet dhe e cila ka kompetenca të ndara nga QKMF-ja. Unë jam i pajtimit që në rregulloren e punës të futet edhe një raport për Qendrën Rezidenciale. Besoj që është i nevojshëm që kjo të bëhet duke u të futur në Planin e Punës së Kuvendit. Po edhe mund ta diskutojmë, mund ta caktojmë dhe të diskutojmë nëse kjo vlerësohet se është e nevojshme, mundemi me sjellë një raport kurdo që e shihni të arsyeshme. Për sa i përket çështjes së laboratorit në Qendrën Kryesore të Mjekësisë Familjare, kjo është sfida më e madhe jo vetëm imja si drejtor por edhe e të gjithë drejtorëve që kanë qenë para meje. Pastaj vlerësoi se i pëlqej anëtarja e kuvendit znj. Drita që e mbajti një fjalim me shkrim shumë të bukur duke e lexuar por nuk e kupton atë që e thotë për shkak që nuk është njohëse e fushës. Unë e kuptoj që ke marrë direktivat edhe nga persona të cilat janë brenda laboratorit për që të njëjtit sabotojnë dhe pengojnë punën e laboratorit. Jam krenar që si Drejtor i Shëndetësisë udhëheqi një institucion i cili është më i depolitizuari në të gjitha institucionet komunale të Vushtrrisë. Shefi i Urgjencës është nga Lidhja Demokratike, shefja e laboratorit është nga Lidhja Demokratike, te radiologjia është i Lëvizjes Vetëvendosje dhe në të gjithë dikasteret e tjerë pothuajse që janë anëtarë dhe aktivisht të partive opozitare. Laboratori në QMF, shefi në të cilin është emëruar në kohën e Lëvizjes Vetëvendosje është arrestuar nga policia për shkak që ka bërë përshkrimin e analizave jo të vërteta nuk e ka matur absolut asnjë biokimi asnjë aparaturë nuk ka funksionuar i ka shkruar me kimik dhe për këtë ka pas aktakuzë edhe është arrestuar edhe mua më vjen shumë keq si qytetar, i njëjti që është pikërisht aty është shok ish-drejtorit të shëndetësisë Sylejman Mehollit, për të njëjtat pajisje që ju po flisni që është furnizuar QKMF-ja.

Ne kemi pasur një problematikë për të cilën këta pretendojnë se pajisjet nuk janë në funksion edhe po ashtu thonë që në QMF1 nuk bëhen analiza. Pas përfundimit të seancës ata punojnë deri në ora

14:00 mundeni me shku dhe me pa se a punon laborator. Në Lumadh laborator punon, nuk është që s'punon. Kjo ka qenë edhe akuzë në fushatë, por që nuk është që me ka shqetësuar mua për faktin që e kemi ditur që Partia Demokratike do të jetë fituese. Qytetarët kanë ditur me bërë dallimin edhe nuk ka pasur asnjë problem. Pajisjet funksionojnë kjo është e vërteta. Ajo që ju keni parë për bartjen e dozave të cilat gjithashtu informatori ju ka informuar por siç e ka keqinformuar edhe Sylen në postimet të tij publike ju ka keqinformuar. Ka pasur prishje të pajisjeve të biokimisë edhe dozat e gjakut të cilat janë marrë në QMF-1 kanë shkuar për të parë atë testimin e aparaturës e cila gjendet në Qendrën Kryesore të Mjekësisë Familjare “Dr. Safit Idrizit”, te tregu. Kjo është ajo e vërteta që ka ndodhur te pajisjet që kanë qenë jashtë funksionit. Pajisjet janë blerë në kohën kur ai ka marrë mandatin si Drejtor, në ditët e para kontrata është nënshkrua. Nuk e di sa ka qenë çmimi realisht, ato e kanë ftuar një mik, shok i ngushtë i Sinan Behramit dhe Sylejman Mehollit. S'kam dashur me diskutuar këtë temë, po ta them shumë hapur, se kam problem. Ne kemi pasur pajisje të cilat kanë qenë me ragjentë të mbyllur që nuk besoj që e kupton se çfarë është dallimi i agjentëve të hapur dhe të mbyllur dhe cili është roli i tyre dhe cilët kanë më shumë cilësi apo jo ajo është blerë.

Kur e kemi iniciuar procedurën e prokurimit për furnizim kam qenë shumë i bindur që nuk ka me pas asnjë aplikues për shkak që ka me ndalë Lëvizja Vetëvendosje për mos me u hap një laborator i cili prej 80 pacientëve shërbimit do ta çonte 160 totalin dhe kjo ka qenë sfidë. Edhe unë kam ditur që nuk do të ketë aplikues dhe kështu edhe ka ndodhur. Çarë ka ndodhur tjetra çudi operatori i cili ka pruar pajisjen i ka vendosur kod pajisjes edhe në momentin që ti ke dashur me adaptuar reagjentin nuk të ka lejuar për shkak që operatori i cili i ka shitur komunës së pajisjen e ka vendosur një kod edhe kodin nuk e ka sjellë. Ne jemi detyruar, me iniciuar një procedurë në Policinë e Kosovës dhe kemi bërë kallëzim penal që nuk po e sjell kodin e po e pengon punën e laboratorit. Në momentin që ka filluar përgatitja në QKMF, operatori ekonomik brenda 10 minutave është lajmëruar edhe e ka sjellë kodin. Edhe kjo është sfidë, unë e pranoj normalisht unë kam më shumë qejf se ti me e rregulluar këtë punë, por kjo është ajo që ndodh aty realisht edhe ne po punojmë çdo ditë për me përmirësuar këtë.

Kur jam ardhur në laborator i kam gjet aty janë katër pesë kompani të ndryshme të cilat kanë distribucion të specifikuar për reagjent. Nëse një aparaturë që e ke sjellë ti kontratën e ka fituar dikush tjetër, ti nuk ma shet mua dhe pajisja, automatikisht ty të mbetet pa reagjent edhe s'mundesh me shti në funksion. Ky është problemi. Aty tjetra te biokimisti kemi hap konkurs për biokimist s'ka kandiduar askush. Ne nuk kemi as biokimist as radiolog. Unë po kërkoj ndihmën e secilit prej juve që mundet me bind një biokimist me ardhur në konkurset që i hapë QKMF-ja për me aplikuar. Po nuk po na aplikon askush. Një biokimist që e ka pagën 1200 € në QKMF dhe e shet një licencë diku tjetër institucione private ka 1200 € në tre vende edhe nuk intereson me punuar te ne fare. Kjo është e vërteta.

Unë jam shumë i lumtur se dikush prej juve na siguron një biokimist dhe një radiolog për shkak që kemi nevojë. Sa i përket refuzimit të vaksinimit, ne jemi të tretët në nivel të Kosovës për shërbimet e vaksinimit që japim. E kalojmë gjithmonë 90%. Fushata shkon jashtëzakonisht mirë. Është mirë që është cekur. Problemi është tek prindërit që po hezitojnë me marrë vaksinë për shkak që po e dëgjojnë Alfred Cakon edhe të tjerët në You-Tube edhe mandej vjen të bën problem prindi dhe refuzon me marrë vaksinat. Edhe ne kemi punuar shumë për shembull kur ka filluar corona virusi kur kemi dhënë fillim kemi punuar me drejtor të shkollave kemi punuar me arsimtarë me mësimdhënës me i bind prind që duhet me marrë vaksinë, por që po ka refuzime, e që nuk është dashur të ketë. Tek gjoba e inspektoratit shëndetësor gjatë fushatës komuna e Vushtrrisë

është inspektuar më së shumti nga inspektorati shëndetësor. Tre deri katër vizita në javë i kemi pas.

Nuk ka pasur problem për mua për shkak që e kam ditur se ku jemi unë s'kam kurrëgjë për të fshehur ndërgjegjen kam shumë të pastër mundur me ardhur çdo ditë në komunën tonë kur është gjet tek çështja e administrimit të vaksinave dikush thoshte se i kanë vjedh vaksinat po ato s'i blenë askush ato po hezitojnë me i marrë e lëre me i'u shitë diku kjo s'është e vërtetë administrimi ka ndodhur për shkak që Sistemi Informativ Shëndetësor i cili udhëhiqet nga Ministria e Shëndetësisë ka pasur probleme të jashtëzakonshme dhe sot kur po flasim ka mundësi që raportohet që sistemi nuk funksionon në QKMF për shkak që është baza ditore. Administrimi i vaksinave është bërë, librat e protokollit kanë qenë evident. Inspektorati shëndetësor nuk e ka pritur librin me ardhur prej Safet Idrizit të ÇMF 1 dhe tek Ali Kelmendi, po e ka shkruar vendimin, e ka dënuar padrejtësisht edhe drejtoreshën edhe shefin e vaksinimit, shefin e SISH-it. Më pas po të njëjtit e kanë hapur sistemin na ka lajmëruar që me i futur në sistem vaksinat të cilat kanë qenë të administruara në librat tonë të protokollit që i kanë dhënë, edhe të njëjtat kanë hy në sistem. Gjoha ka qenë e padrejtë, totalisht e padrejtë. Por kemi qenë në kohë fushatë. Unë e kam kuptuar sulmet që janë bërë dhe nuk ka qenë kjo punë aspak problematike. Më shqetëson fakti që nuk po foli për mungesën e barnave prej dhjetorit komuna e Vushtrisë nuk është furnizuar me barna nga Ministria e Shëndetësisë që udhëhiqet nga partia juaj. Po flasim për barna esenciale pse nuk e ngritin këtë shqetësim. Në shëndetësi besoni që në momentin që kam marrë përgjegjësinë s'kam bërë kurrë dallime partiake as politike. Jam shumë i lumtur në mënyrën që besoj që udhëheqi që për formën e trajtimit që ju bëj punëtorëve QKMF-së dhe punëtorëve shëndetësor në përgjithësi në Vushtrri. Po kisha dashur dhe apeloj që partia Lëvizja Vetëvendosje, kur e takoni ministrin Arben Vitia me i thënë që me rritë furnizimin me barna esenciale. Në fund tha se Komuna e Vushtrisë është përfutuese e një autoambulancë për QKMF nga niveli qendror, dhe ne jemi të fundi që e kemi pranuar këtë furnizim për faktin se është menduar se do të përdoret për fushat elektorale, por ne nuk e kemi keqpërdorur këtë çështje për poena politikë.

Gresa Muli, anëtare e kuvendit- vlerësoi se si anëtare e kuvendit për mandatin e tretë për të dhe shquhet se është goxha realiste, duke mos i hiperbolizon gjërat. Me ju treguar të drejtën kur e kam lexuar këtë raport duke e marrë parasysh me Drejtorin paraprak që u kanë edhe kur e patë sjellë një raport në nivel skandaloz, tani duket që raporti që është ofruar është goxha i detajuar për çka e falënderoj Drejtorin. Pastaj ceku se nuk është e fushës edhe nuk ka dëshirë me hy detaje për shkak se munda me ngec se nuk i di çështjet e shëndetësisë bile bile me tregu të drejtën për një gjë kishte interesim të marrë informatë se qysh i thonë realisht EKG në terminologjinë mjekësore. Përveç informatave që i përmendën edhe parafolësit, mungojnë informatat për laborator dhe për pjesën e shtëpisë rezidenciale. Me tej pyeti drejtorin për mamograf se kur e kemi marrë donacionin dhe qysh janë procedurat për me bë një mamografi në QKMF. Gjithashtu për këtë aparat e EKG-së që nuk e di qysh e ka emrin ndryshe njoftoj se në bazë të përvojës personale i ka rastisë dy herë me dërguar prindërit në vizitë, për shkak të dyshimit për infarkt edhe nuk është në rregull që në urgjencë me e anashkaluar mundësinë për infarkt kur të gjitha janë kanë të gjitha simptomat me arsyen që nuk kemi EKG edhe nuk mundem me ofruar këtë shërbim. Informata është që urgjenca e ka EKG po por që nuk e kanë futur në funksion, apo nuk kanë dashur ta oftojnë këtë shërbim për arsye që nuk i njohim. Nga vizita personale që ka pasur me prindërit e saj aty ka papërgjegjësi nga stafi për sa i tako ofrimin të shërbimeve. Ë gjithashtu prej përvojës personale për pjesën e vaksinimit, vlerësoi se si nënë e dy fëmijëve, ka përvojën që shumë prindër hezitojnë të japin vaksinat për fëmijët e tyre deri sa ata të fillojnë të flasin, kjo për faktin se ka frikë se mos po ka ndonjë ndikim negativ tek fëmija. Për ta përforcuar akoma më shumë dyshimin është fakti se

pediatri inkurajon që deri sa fëmija të filloj të flasë të mos i marrin këto vaksina. Prandaj në këtë kontekst e mbështet diskutimin e Drejtorit të Shëndetësisë se ka hezitime për procesin e vaksinimit. Kështu që këtë pjesë nuk e fajësoj drejtorinë po është problemi tek prindërit edhe kuptoj plotësisht se unë edhe si një grua edhe si një vajzë edhe si një profesioniste që kam kryer edhe master, hala jam në dyshime për këtë pjesë kështu që për këtë pjesë e amnistoj drejtorinë se nuk ka aspak faj, por faji qëndron tek prindërit duke përfshi edhe atë.

Fidan Bejta, anëtar i kuvendit- Përshëndetje kryesuese, përshëndetje kolegë asamblesë, përshëndetje drejtorë të drejtorive. Fillimisht edhe unë po dua me ju uruar muajin e Shenjtë të Ramazanit edhe krejt agjëruesve dhe agjërimit të lehtë e të pranueshëm. Nuk e pata njëjtë sot me dalë me fol. Po tek çështja e shëndetësisë po besoj që më takon se vij prej një familje që jam rrit duke i vizituar Qendrat e Mjekësisë Familjare, duke i vizituar spitalet. A është shëndetësia në komunën Vushtrrisë në situatën më të mirë? Normalisht që nuk është. A është qysh po e bëjnë opozita? Normalisht që nuk është. Me Drejtorin e Shëndetësisë z. Lorikun njihet prej fëmijë, për që jam shok i mirë me Lorikun nuk e ka fare problem ballafaqimin me të në kuvend për interes të qytetarëve. Po Loriku mendoj që është drejtori më i mirë i shëndetësisë që ka pas ndonjëherë komuna e Vushtrrisë. E di unë që ka opozitarë në Vetëvendosje që ja mbajnë si ekspertë të shëndetësisë dhe ju adresua anëtares së kuvendit znj. Dritë se i ka informatat shumë të gabueshme se është mirë ju me e pyet Arben Vitinë në Spitalin Regjional në Mitrovicë ku Reparti i Ortopedisë është njëri prej reparteve më të suksesshme, jo pse shërben vëllai i tij po e thonë statistikën e me ju marrë juve me vizituar ju vjen keq ku ndërrohen doktorët që i kryejnë minimumi shtatë operacioni në ditë. Asnjë investim nuk është bërë, asnjëherë nuk është vizituar. Po ju kthehem materialit që le të shkojmë pak më për toke. Po e urrej këtë gjuhën me dalë veç me fol gjenerale, jepni ide. Ju përkrahem kudo që e keni mirë ju përkrahim. Mirëpo mos dilni këtu, kjo është keq, kjo është keq, kjo është keq! Tregoni pra se si është mirë? Unë e lypa fjalën për me e ngrit si shqetësim se edhe unë e kam pas informacionin që ka mungesë të barnave. Sot për shembull ka operacione në spital të Mitrovicës që dështojnë për gjëra esenciale. Është spital regjional ku shumica e pacientëve 50% janë të Vushtrrisë. Ka repart që nuk ekziston në spital. A ke ortoped në spital të Vushtrrisë? A kemi tash është konkursi po deri sot s'ka pas. Domethënë një qytetar i Vushtrrisë për probleme ortopedike duhet të adresohet në Mitrovicë për këtë po e përmendi si spital regjional. Andaj jemi qytetarë të kësaj komune, jemi shokë, jemi miq, të ruajmë pak gjuhën se donë me es- kaluar goxha.

Berat Sadiku, anëtar i kuvendit-përderisa Drejtori i Shëndetësisë ishte duke ju përgjigjur kolegëve, mua më shkruan një banor i fshatit Lumadh dhe më njoftoi që në QMF në Lumadh bëhen vetëm tre analiza laboratorike. Është e vërtetë apo jo kjo informata?

Drita Dibrani, anëtare e kuvendit- Atëherë drejtor nuk më përgjigje në pyetjen se sa shkolla nuk kanë furnizime me ujë të pijes dhe qasej në kanalizim. Gjithashtu do ishte mirë që në mbledhjen e ardhshme të kuvendit me i sjellë emrat e komisionit që i ka bërë specifikat e pranimit dhe vlerësimin të laboratorëve të cilat janë pranuar.

Mentor Ferizi, anëtar i kuvendit- tha se sa i përket raportit dhe qasja e drejtorit vlerësoi se kemi të bëjmë me një raport të detajuar për periudhën janar-dhjetor 2025. Dhe shtoj se ka dy kërkesa. E kam një kërkesë që e kishe cekur në raport që tek mjekimi paliativ po kujdesin edhe për pacient nëpër shtëpi. Ndërsa e kam një shqetësim që mendoj është edhe një procedurë burokratike që realisht edhe mjekët po i ngarkon tek pacientet me sëmundje kronike ku vazhdimisht kërkohet një receipt përshkrim i terapisë ku shumica e pacientëve, zakonisht raportet e tilla i marrin tek mjekësia sekondare për shembull tek diabetikët tek endokrinologu. Andaj konsideron se është e palogjikshme ajo procedurë me u thjeshtësua me u heq sepse ata janë pacientë që vijnë me listë

prej ministrisë. Pastaj furnizimi me barna shumë mirë që e ceke në këtë muaj nuk ka pas mjaftueshëm prandaj kisha pas dëshirë që ajo procedurë edhe me i liruar mjekët edhe mos me i ngarkuar mjekët e mjekësisë familjare me u marrë me pacientë me i trajtuar. Andaj është mirë me parashtruar një kërkesë të ministrisë se e di që ndoshta ministria ju ka obliguar që me bë përshkrimin se nuk është e drejtë për një terapi të endokrinologut me përshkruar një mjek i mjekësisë familjare.

Mendoj që ministria po obligon me shkel ligjin. Ai e përgëzoj për raportin Drejtorin e Shëndetësisë por kisha këtë shqetësim edhe njëkohësisht që u cek edhe prej asamblistëve shërbimit që është ndërpre nëpër qendra nëpër bashkësi lokale ofrimi i shërbimeve të stomatologjisë po unë e kam një kërkesë që me bë shërbimi stomatologjik 24 orë në komunën e Vushtrrisë, dhe mendon se nuk është shumë e nevojshme me i shpërndarë nëpër qendra se besoj që më mirë është me u rrit numri i shërbimeve brenda repartit që mendoj është shumë e nevojshme se pacientët e Vushtrrisë duhet me u trajtuar në Qendrën e Mjekësisë Familjare në Mitrovicë sepse tek ne nuk ka shërbim stomatologjik 24 orë e di që ke iniciativë dhe të përgëzoj drejtor por kisha pasur dëshirë që edhe të mbështes edhe publikisht është edhe kërkesë e kuvendit që me ofruar shërbimin 24 orë për të pacientët për nevojat emergjente në repartin e stomatologjisë.

Lorik Maxhuni, drejtor i DSHPS-së- duke u përgjigjur në çështjet e ngritura nga anëtarë e kuvendit njoftoi e parë është tek EKG-ja. Është e vërtetë që ne kemi këtë aparaturë por nuk kemi material shpenzues. Jemi duke bërë të pamundurën që me u furnizuar, besoj që sot furnizohet pasi që dje kam pasur informata që kemi mbetur pa furnizim. Normalisht po mundohem me kapacitete që ka komuna Vushtrrisë me një kontratë e cila është shumë e vogël me u furnizuar me aq sa është e mundur. Është problem tek KG-ja për shkak që kur ka marrë pozitën e Drejtorit të Shëndetësisë e kam parë që realisht ka pasur një farë lloj prej shumicës së stafit të vjetër që nuk kanë dashur me bë EKG ndoshta për shkak pasi që një kohë të gjatë nuk e kanë përdorur, edhe nuk kanë ditur realisht me përdorë. Unë e kam bërë një trajnim për EKG. E patëm këtë çështje të diskutimit në mbledhje dje në QKMF që ndoshta është e nevojshme edhe një trajnim me ja bë stafi në këtë qendër. Problemi tjetër është tek ne po flasim për mjekësi familjare ku zakonisht një përqindje të madhe të mjekëve kemi mjekë të përgjithshëm që dalin prej bankave shkollore të Universitetit të Prishtinës. Edhe ata që merren mjekësi e dinë dhe e kuptojnë rëndësinë e leximit të saktë të EKG-së edhe interpretimit të saj dhe sa e vështirë është.

ër këtë arsye shumica e tyre dhe hezitojnë me bërë leximin e EKG, dhe kështu gjithmonë udhëzohet për në shërbimin sekondar.

Megjithatë në urgjencë EKG, funksionon. Unë nuk besoj që ka neglizhencë në urgjencën tonë tek rastet të cilat mund të ketë raste sporadike, por në shumicën e rasteve në urgjencën tonë nuk ka neglizhencë të asnjë pacienti, sidomos të simptomave të infarkt të cilat janë të vërejtshme. Besoj që të gjitha procedurat merren në raport aty është cekur që koha e trajtimit të pacientëve në urgjencë është zgjatur, që flet për një cilësi më të më të madhe për shkak që i kushtohet vëmendje më të madhe qytetarëve. Pastaj tek mamografia, ne kemi marrë mamografinë në një bashkë donacion me Islamic Kosova.

Problemi qëndron te leximi i radiografive. Unë i kam shkruar Ministri Shëndetësisë në një farë lloj forme që të obligojë spitalin Sheik Zajed që të na e lexojë mamograficitë. Nuk kam has në mirëkuptim! Ne kemi pasur takime të rregullta me spitalin për shkak që ai udhëhiqet nga SHSKUK-ja kemi kompetenca të ndara. Ne kemi pasur për shembull një rast kur gratë e veteranëve dhe dëshmorëve kanë kryer mamografinë, por që të njëjtave nuk i është bërë leximi dhe interpretimi nga radiologjia shqiptare Sheikh Zayed. Jemi munduar me gjet një modul moduli që

ata kanë propozuar është i paarritshëm për shkak që baza e legjislacionit të kujdesit shëndetësor na e pamundëson. I kam shkruar Ministrin e Shëndetësisë, ja kam adresuar problemin.

Problemi i radiologut është problem që po na mundon realisht në radiologji. Kemi hapur një konkurs, me sa di tri konkurse kanë dështuar. Për këtë çështje jemi munduar me gjet zgjidhje përmes shërbimeve këshillëdhënëse përmes procedurave të prokurimit kemi hapur dy herë, dy herë nuk ka pasur aplikant, për shkak të pagës edhe për shkak që sektori privat po i merr të gjithë kuadrat e radiologjisë. Në laboratorin në Lumadh vërtetë që bëhen vetëm tre analiza. Edhe ky është një problem i riorganizimit dhe për këtë besoj që kemi me trajtuar një ditë në një seancë ku duhet me pas përkrahjen e juaj me bë një ndryshim të statutit ku obligohem që me i kthyer disa qendra në AMF-ja për shkak që kjo mbas po na penalizon në raport të performancës kur po bëhet tek QMF-ja. Kërkohej që secila QMF me pas laborator edhe realisht momentalisht në gjendje të cilën gjend komuna e Vushtrrisë ku po thuaj që është e pamundur që në të gjitha QMF-të të funksionojë laboratorit edhe në këtë mënyrë ndoshta ka qenë mirë që me rikthyer në AMF përveç tri qendrave që janë më të mëdha që bënë pjesë Lumadh, fshati Maxhunaj dhe fshati Smrekonicë janë tre lokalitete të mëdha dhe të tjerat me i zbërthyer në AMF.

Një dukuri tjetër është që në disa fshatra, për shembull në Stroc edhe në Skromë nuk janë funksionale. Edhe për ata unë mendoj që kuvendi i komunës duhet me i largu me anë të një propozimi-vendimi që duhet me bë për plotësim-ndryshim të statutit me i largu këto të dyja për shkak që nuk ofrohet shërbim se nuk ka banor në fshatin Shkrom, sipas regjistrimit të fundit të popullsisë është veç një është një banor. Patjetër që nuk është ndonjë lloj sekretit absolut unë mundem me ju drejtuar Drejtorisë së Prokurimit apo QKMF-së nëse kanë në databaz t'i përcjell në email i sheh i vlerëson pa asnjë problem. Tek receta është Sistemi Informativ Shëndetësor që funksionon në Republikën e Kosovës sistem elektronik të gjitha udhëzimet e receta që japin duhen me u fut në sistem për shkak që bëhet një kontroll shumë rigoroz prej inspektoratit shëndetësor. Edhe në këtë pikë ne e dimë që çdo recetë është një farë lloj kontrolli për shkak se sëmundjet kronike mundet shumë lehtë barnat me dërguar në një komplikim tjetër shëndetësor. Prandaj besoj që është i duhur dhe Udhëzimi Administrativ, por dhe rregullorja e Ministrisë së Shëndetësisë na obligon që duhet me pas recetë për shkak që është procedurë e tillë të cilën ne nuk mundemi me ndryshuar. Duhet vullnet, tjetër.

Ne kemi mbledhje të kolegjiemeve ku diskutojmë, por duhet një vullnet pak më i madh për me rregulluar këtë çështje. Tek stomatologjia 24 orë, e di që është e nevojshme për shkak që është një shërbim të cilin qytetarët e komunës tonë nuk e marrin 24 orë. Drejtohen gjithmonë nëpër qendrat në Mitrovicë. Është lehtë i arritshëm. Momentalisht ka qenë dhe premtim elektoral i kryetarit në fushatë që do ta bëjmë stomatologjinë 24 orë. Ky pa dyshim ky qëllim do të arrihet. Momentalisht për numër të banorëve duhet të ketë 1/mjek-stomatolog për çdo 6.000 banorë. Realisht numri është 10 stomatologë që i ka Qendra Kryesore e Mjekësisë Familjare. Po flasim për dy stomatologë të cilët janë në specializim me drejtimin e Ortodoncis që do t'i kthehen QKMF-së, por që aktualisht nuk ofrojnë shërbime për QKMF-në. Gjithashtu po flasim edhe për një mungesë të një punëtori tjetër i cili ka qenë Drejtori i Shëndetësisë i cili ka qenë në një pushim pa pagesë për shkak të një sëmundje që e ka pasur një vjeçare. Gjithashtu një stomatologu është në pushimin e lehonisë. Ne aktualisht veprojmë me gjashtë stomatologë, por besoj që do ta rregullojmë edhe këtë çështje për të rritur numrin edhe për dy stomatologë, për ta çuar gjithsej në 12 dhe me rikthimin e këtyre stomatologëve që janë në specializim, ne do ta bëjmë shërbimin stomatologjik në 24 orë për shkak që është shumë i nevojshëm dhe qytetarët duhet me marrë këtë shërbim për shkak që për shkak të një dhimbje të dhëmbit nuk duhet me pasur nevojë me shkuar në Prishtinë ose në Mitrovicë.

Diellza Pllana, anëtare e kuvendit- e nderuar kryesuese, të nderuar anëtarë të Kuvendit, nuk e kisha në plan me dalë me fol, por marr parasysh ata që u fol këtu edhe marr parasysh faktin që unë jam studente e vitit të gjashtë të mjekësisë e ndjeva si obligim. Fjala jonë këtu ka peshë sidomos kur vjen prej anëtarëve të kuvendit që janë zgjidhur për të tretën herë me radhë siç është Gresa. Unë e kuptoj shqetësimin e anëtares së kuvendit znj. Gresa Muli si prind mirëpo e di që shumë prind të tjerë mund të ndikohen nga ky perceptim i Gresës. Vaksina është arritje ndër shekullore. Në momentin që IKSHPK-ja e rekomandon marrjen e një vaksine, ju si prind, ne si qytetarë absolutisht duhet të mirë informohemi. Për këtë arsye unë kërkoj nga Drejtori për Shëndetësi që fushatat sensibilizuese të prindërve për sa i përket kësaj fushe, këtij shqetësimi që realisht qenka shumë më i madh se sa që unë e kam menduar me qenë më të shpeshta përveç se më të shpeshta po ashtu edhe më efektive. Gjithashtu sa i përket një pjese tjetër që u cekë prej Drejtorit të Shëndetësisë që pjesa e hezitimit të doktorëve të rinj me lexuar EKG unë e shoh shumë më shqetësuese ose bazë shqetësuese sa edhe mungesa e materialit për me u realizuar EKG-ja atëherë kur është e nevojshme. Nuk dua me besu që ka doktorë të rinj që dalin prej bankave të Universitetit të Prishtinës edhe hezitojnë me bë një EKG rastin e dyshimit për infartë për shkak se nuk dinë me e lexuar, në rastet kur ka të tilla raste evidentoni edhe dënioni.

6. Informatë lidhur me lejet ndërtimore, kushte ndërtimore dhe leje rrënimi për vitin 2025;

Berat Sadiku, anëtar i kuvendit- informata që na ka ardhur lidhur me lejet ndërtimore dhe kushtet ndërtimore për vitin 2025 si dhe plotësim ose pyetjet që janë bërë nga kolegia Fatmire Cecelia gjatë KPF-së i kemi marrë këto informata. Pastaj pyeti Drejtorin e Drejtorisë së Urbanizmit sa i përket pikës 1.1 të plotësimi që e keni dorëzuar në email-adresë para dy ditësh objekti përballë komunës së Vushtrrisë, jemi duke fol për parcelën ku ka qenë parkingu këtu afër. Si informatë unë po e shoh pak të paqartë ose ndoshta mundet me qenë pak e paqartë edhe për kolegët asamblistë e kemi një vendim të lejes ndërtimor të lëshuar në datë 10.06.2025 ndërsa më poshtë ceket që e kemi një vendim nga organi i shkallës së dytë përkatësisht vendimi nga MMPI-ja i datës 22/02/2024 me të cilin është anuluar vendimi i shkallës së parë cili vendim i shkallës së parë është anuluar, afërsisht po e di rrjedhojën e saj edhe në kohën kur kam qenë unë drejtor kemi pasur raste të tilla kur nuk i kanë plotësuar kriteret ligjore e kemi refuzuar si lëndë përmes vendimit zakonisht investitorët kanë qenë të prirur që me gjet qoftë lidhje ose me kthyer një vendim dhe me anuluar vendimin tonë të Drejtorisë të Urbanizmit, edhe në raste të tilla Drejtoria e Urbanizmit konform Ligjit, të Ndërtimit si dhe Udhëzimeve Administrative e ka anuluar kërkesën e investitorit. Kemi pasur disa raste që Drejtoria e Urbanizmit ka bërë deri në tre anulime të asaj kërkesë për leje ndërtimore. Andaj nuk është shumë të arsyeshme që anulimi që ju ka ardhur për shfuqizim të vendimit të shkallës së parë nga MMPHI-ja që ju të shkoni direkt me dhëniet e lejes ndërtimore, kemi kaluar këndeje parë dhe e kemi parë dhe të jeni të bindur që nuk kemi asnjë kriter ligjor të respektuar. Nuk e kam parë projektin, nuk e di çfarë ka dorëzuar në Drejtori të Urbanizmit, por nëse flasim me gjendjen faktike, unë e them me përgjegjësi të plotë që janë shkelur të gjitha kriteret ndërtimore në bazë të Ligjit të Ndërtimit, Ligjit të Planifikimit Hapësinor dhe udhëzimeve administrative.

Sa i përket listës të kushteve dhe lejes ndërtimore, zakonisht ka qenë praktike e kuvendit edhe në vitet e kaluara që lista të sjellët në kuvend. Jemi munduar me shikuar edhe në faqe të komunës por nuk kam hasur një listë të tillë, kështu që do të ishte mirë që ajo praktikë e mirë e kuvendit të vazhdohet edhe tash dhe lista e lejeve dhe kusht ndërtimore të sjellët në kuvend në formë të shtypur për anëtarët e kuvendit.

Fatmire Cecelia, anëtare e kuvendit-lidhur me këtë pikë të rendit të ditës për sa i përket informatës për lejë ndërtimore dhe kushtet ndërtimore, njoftoj se në mbledhjen e KPF kam kërkuar sqarim shtesë sa i përket kësaj informate me qenë se kemi pasur vetëm një fletë me dy faqe, një raport shumë i shkurtër dhe jo i detajuar. Tek pika 1.1 tek ky objekti përballë komunës që e kam cekur edhe në KPF, i nderuar drejtor, meqenëse kryetari nuk është këtu, a ka mundësi me na treguar çfarë ka ndodhur me këtë objekt? Qysh keni lejuar në sy të komunës me filluar me u ndërtuar ky objekt, me i'u mbyllë dritare banesës që është aty afër pothuajse në parcelë të banesës ka filluar me u ndërtuar me mbyllë dritaret, me ju mbyll ballkonet, banorëve të këtij objektit afër tij. I keni shkelur të gjitha kriteret e lejes ndërtimore, këtu e keni cekë që ju i kemi dhënë leje objektit në muajin e gjashtë të vitit 2025 duke u thirr në vendimin e ministrisë që paraprakisht ju ka dhënë leje me refuzimet e juaja paraprake që kjo ka qenë një nuk e di qysh ka qysh funksionon në Drejtori të Urbanizmit mirëpo me këtë sa e shoh që është një shkelje. Në Komitetin për Politikë dhe Financa mua më është thënë nga kryetari që këtij objekti i' u ka revokuar leja. Drejtor a është revokuar leja? A ka leje? A ka me u ndërtuar ky objekt? Çfarë keni me ndërmarrë ju si Drejtori e Urbanizmit, meqenëse jeni organi që i jepni lejet ndërtimore. Tek objekti te pika 1.2 e kësaj informate e keni cekur këtu që as nuk ka kërkuar leje ndërtimore, as nuk ka leje ndërtimore, as ka kërkuar kurrfarë pëlqimi për leje. A bën me ditë ku është Drejtorja e Inspektimeve apo fare nuk është duke funksionuar, qysh me u ndërtuar objekti 2000 m² në sy tonë që për çdo ditë e shohim shumica prej neve e frekuentojnë atë rrugë edhe komuna mos me ditë që u ndërtua me thënë, s'ka kërkuar leje tash nëse s'ka kërkuar leje le të bënë çka donë le të ndërton çka të donë, le ta shkatërron tokën bujqësore.

Te ndërtesa, në rrugën "Ismail Qemajli" ku ka kërkuar sqarim shtesë e keni dhënë një arsytim të pabazë, dhe paraprakisht i keni dhënë lejen dhe kushtet për leje ndërtimore ndërtuesit mandej e keni sjellë në kuvend këtu me shpronësu atë pjesën tek lokacioni konkretisht tek "fi bello" mahalla që ka qenë ju na keni qitë para aktit të kryer, jeni tallur me ne me të gjithë anëtarët e kuvendit, sepse të gjithë kemi votuar <pro> sepse arsytimi i kryetarit në këtë foltore ka qenë që votoni sepse ka me u zgjeruar rruga prej vendit të quajtur tek <kafja e sejdës> . Qysh e dimë ne prej udhëkryqit tek Selact ka me u zgjeruar rruga deri tek lokali Sueno që është aty afër Real market në kryq të rrugës. Prandaj shtroj ne për çka jemi këtu me na vu në lajthitje duke na mashtruar para syve të gjithëve këtu ne kemi votuar kemi qenë të pajtimit me zgjeruar rrugën sepse ne si grup çdo herë kur është interesi i përgjithshëm qytetar nuk jemi kundër mirëpo jo këtu ka pasur mashtrim dhe me këtë çështje duhet të merret prokuroria. Ne kemi votuar me këmbyer pronën komunale, për zgjerim rruge, mirëpo e vërteta është se ai investitori e ka marrë lejen shumë më herët, dhe kuvendi vetë i' a ka bërë aminin. Edhe në këtë rast është dashur të alarmohet Drejtorja e Inspektimeve duke dal në teren dhe në shikim të vendit dhe gjendjes faktike del se a ka leje ndërtimore dhe kur është lëshuar ajo leje ndërtimore, dhe se ka komunikim zyrtar mes Drejtorisë së Urbanizmit dhe asaj të Inspektimeve se me të vërtetë është shumë shqetësuese kjo çështje. Mandej vlerësoi se kjo është për mua shumë shqetësuese dhe kërkoj nga organet që të merren me këtë punë sepse askund nuk është zgjeruar rruga, dhe se në çdo vend janë shkelur vijat ndërtimore tek ky objekt prej ku ka filluar tek lagjja "Selaci" aty e deri tek lokali "Sueno" është shkel vija ndërtimore e që nuk është në rregull sepse qyteti po bëhet jo funksional me rrugë shumë të ngushta, ku as autobusi nuk mund të kalon aty, nuk e di pse po veproni kështu për qytetit po shkatërrohet për 100 vjet e ardhshme sepse atë objekt nuk mundesh ta rrënoh sepse e ke pajisë me leje ndërtimore.

Më tej pyeti Drejtorin e Urbanizmit pse nuk është e publikuar lista për kushte ndërtimore dhe për lejen ndërtimore, sepse kjo është shumë e rëndësishme, të dihet për kushtet ndërtimore dhe për leje

ndërtimore se kur qytetarët aplikojnë për leje ndërtimore, për kushtet ndërtimore dhe kur ja jepni, sepse keni rastin që dikush aplikon sot e merr pasnesër e dikush pret me vitet e tëra.

Drita Dibrani, anëtare e kuvendit- Informata e Drejtorisë së Urbanizmit tregon qartë se prioriteti i kësaj qeverisjeje është betoni dhe jo qytetari. Nga 81 kërkesa për leje ndërtimi, pothuajse gjysma (34 leje) i përkasin Kategorisë II – pra objekteve kolektive dhe industriale. Përderisa lejet për ndërtesa të larta jepen me shumicë, në këtë raport nuk shohim asnjë rresht për hapësirat gjelbëruese. Pyetja për ju është: Sa është përqindja e hapësirave publike që këto 34 leje i kanë siguruar qytetit tonë, apo po vazhdojmë me betonizimin e egër vetëm për interesa të ndërtuesve? Gjithashtu, në faqen 3 të raportit, shohim se 15 kërkesa janë ende në procedurë. Ky është treguesi i burokracisë që i lodh investitorët dhe qytetarët që presin me muaj të tërë para dyerve tuaja. Pyetjet për Drejtorin Jusufi: z. Drejtor, në këto 34 projekte të Kategorisë II që keni miratuar, sa metra katrorë hapësirë gjelbëruese dhe kënde lojërash janë siguruar? Sa është koha mesatare që një dosje rri në sirtarët tuaj para se t'i kthehet përgjigje qytetarit, duke pasur parasysh zvarritjen e 15 kërkesave që figuron në raport?

Mentor Ferizi, anëtar i kuvendit- I nderuar drejtor të falënderoj për këtë raport dhe bëri pyetje? A ka mundësi të paraqit lista e zyrave projektuese që kanë pasur më së shumti projektet të merituar gjatë vitit 2025? Më intereson ato zyrat projektuese numrin e saktë gjithsecila sa i ka, sa projekte janë miratuar për secilën zyrë projektuese dhe sa ka qenë koha mesatare e trajtimit për secilën prej tyre. Por ka edhe një shqetësim të paktë këtë shqetësim e kam për shkak se nëse një investitor investon 3 milion nuk është në gjendje do rrethoja me i vendos, kjo thjesht përpos që është e turpshme është edhe tepër e rrezikshme. Duhet thjesht të mendojmë që rrezikohen fëmijët tonë kur nuk është në gjendje disa rrethoja me i vendos një ndërtues që investon 3 milion unë nuk pajtohem me këtë gjendje. Ne jemi për me i përkrah me jep leje sa më shpejt me krijuar kushtet për investitorët, por nuk pajtohem që ai mos me vendos një rrethoje pa marrë parasysh kush është. Me të vërtetë është shqetësuese. Ndoshta janë afër shkollave nuk ka rrethojë. Nuk dua me fol për objekte individual. Nuk po më intereson kush është absolut. Rrethojën duhet me vendos mos me mund fëmija im me hy brenda atij rrethi dhe me u rrezikuar jeta e tij. Nuk po më intereson rrethojën duhet me pasur çdo objekt edhe nëse ka investuar e ka prerë rrugën asfaltin e i ka investuar 2 milion euro 2 metra asfalt duhet me i shtruar edhe ai duhet me u detyruar për këtë, ndryshe është e palogjikshme dhe e palejuar.

Refik Maloku, anëtar i kuvendit- tha se në fjalimin e parë që e mbajta para rendit të ditës unë ju thashë qëllim i kësaj qeverie janë veç dy gjëra, dhe atë tenderët e mëdhenj edhe tokat, ndërtimet. Andaj shtoj se a po e shihni që krejt puna esenca e qeverisë të kryetarit z. Idrizi bazohet ose kulmon me qëllimin e vetëm tenderët milionësh edhe tokat, ndërsa ne i marrim disa sende të vogla nga pak.

Fidan Bejta, anëtar i kuvendit- deklaroi se ndoshta u keqkuptova më herët, sepse ai asnjëherë nuk kërcënon. Unë veç po kërkoj prej juve me u bë një grup i mirë. E për këto probleme që po diskutoni do të qëndron konsistent deri në fund, shpreson që edhe opozita do ta mbështet në adresimin e interesave qytetare.

Drilon Jusufi, drejtor i DUMM-së-tha se, si Drejtori e Urbanizmit dhe Mbrojtjes së Midisit kemi një staf të përbërë nga disa arkitektë, inxhinierë, juristë, të gjitha kërkesat për kushte dhe leje ndërtimore si dhe leje rrënimi, ato kalojnë për disa filtra para se lëshohen këto vendime. Sa i përket transparencës së këtyre vendimeve, ato janë publikuar edhe në faqen e komunës të Vushtrrisë, lejet ndërtimore, kushte ndërtimore dhe po ashtu mund të vini t'i shikoni dhe në zyrat tona edhe për afatet e lëshimit të këtyre kushteve dhe lejeve ndërtimore. Gjithashtu secili nga ju jeni mirëseardhur.

Sa i përket pyetjes së anëtarit të kuvendit z. Berat Sadiku, te pika 1.1 tek objekti mbrapa komunës këtu kemi pasur një refuzim nga Drejtoria e Urbanizmit dhe Mbrojtjes së Mjedisit të komunën e Vushtrisë dhe pas këtij refuzimi të kërkesës së palës, atëherë pala ka dërguar një kërkesë tjetër në Ministrinë e Planifikimit Hapësinor ku është kthyer një përgjigje për rishqyrtim dhe rivendosje në Drejtorinë e Urbanizmit. Pastaj ne pas shikimit të kësaj lëndës dhe zyrtarët tanë në pajtim me legjislacionin në fuqi, ligjet e ndërtimit dhe normat e planifikimit hapësinor atëherë i kemi lëshuar këtë leje ndërtimore duke respektuar dhe ndriçimin dhe distancat nga objekti mbrapa kësaj parcele. Çdo informatë shtesë për këtë lëndë mund të vini në zyrat tona të bëni ndonjë kërkesë. Lidhur me objektin tek Ura e Sitnicës njoftoj se gjatë kohës sa ka qenë drejtor nuk është bërë ndonjë kërkesë për kushte apo për leje ndërtimore por më herët nuk e di a ka pasur ndonjë kërkesë për atë parcelë apo jo. Ajo është përgjegjësi e Drejtorisë së Inspektimeve. Tek rruga “Ismajl Qemajli” po ashtu objekti në fjalë domethënë leja ndërtimore dhe kushtet ndërtimore janë lëshuar sipas profilit të rrugëve në Planin Zhvillimor Komunal të cilat janë të respektuara në leje për punën e respektimit në vend të ngjarjes domethënë është Drejtoria Inspektimeve e cila merret në inspektimet e vijave ndërtimore të atyre objekteve.

Lidhur me hapësirat gjelbëruese, për hapësirat gjelbëruese zakonisht në kushtet ndërtimore dhe në lejen ndërtimore ne e kemi kërkesën që të respektohen. Po ashtu ligjërisht është i kërkuar. Ka raste kur disa investitorë apo investues ndoshta nuk i respektojnë, nuk i bëjnë hapësira gjelbëruese, por me leje janë kushte kryesore që të lëshohet një leje ndërtimore. Objekti që ishte temë diskutimi ka leje të ndërtimit, por për momentin kam bërë disa tejkalime sipas informatave që kam në Drejtorinë e Inspektimeve, kam bërë disa tejkalime të vogla për ata për ata i kanë ndërprerë punimet dhe nuk e di se do të vazhdoj tutje lënda e saj leje ka për tejkalim është Drejtoria e Inspektimit që mund t'i bësh pyetje në atë drejtori. Sa i përket rrethojave të ndërtesave janë të obliguara po ashtu që të vendosen gjatë ndërtimit. Ajo përgjegjësi është e Drejtorisë së Inspektimit. Duhet inspektorët e ndërtimit ashtu edhe janë të obliguar të dalin në teren dhe të inspektojnë ndërtuesit se a i kanë vendosur rrethojat e sigurisë në punë.

Refik Maloku, anëtar i kuvendit- tha se pyetjet të cilat i parashtruan kolegët e tij, në asnjërën prej tyre drejtori nuk dha përgjigje. Këtu u tha që ky objekti që ka filluar të ndërtohet afër objektit të komunës, asnjë standard urbanistik dhe të lejes ndërtimore nuk e ka respektuar. Me fjalë tjera ai ndërtim si tillë nuk e plotëson asnjë kriter urbanistik, ndërtimor. Tutje shtoj dhe vlerësoi se Drejtoria e Urbanizmit është në hall të madh se ka për t'i miratuar krejt këto të “zezat” që kanë me i bë pushteti aktual, i vjen shumë keq prej tij. E dyta pyetja tjetër ishte rruga tek lokali i quajtur “Sueno”, ne kemi kërkuar ndërrim-këmbim të pronës komunale me pronën private, pyetja është a është bërë ky ndërrim i pronës? dhe se cilën pjesë e ka përfituar komuna në saje të këtij këmbimi, si dhe a është realizuar zgjerimi i rrugës ashtu siç ishte kërkuar në vendimin e kuvendit që e kemi aprovuar në shtator të vitit 2023.

Berat Sadiku, anëtar i kuvendit- tha se nëse Drejtoria e Urbanizmit ka vendosur njëherë me e refuzuar këtë lëndë dhe nëse pala ka ushtruar ankesë në shkallën e dytë dhe shkalla e dytë e ka kthyer në rishqyrtim dhe rivendosje, nuk ka mundur prapë që ky staf i Drejtorisë së Urbanizmit kur e dina që ka arkitektë dhe inxhinierë me vendos konform ligjit dhe me lëshuar leje ndërtimore. Dhe shtoj se nuk e ka parë projektin po nga ajo çfarë është në terren nuk ka asnjë kriter të respektuar as të Ligjit të Ndërtimit e as të Udhëzimeve Administrative. E dimë që udhëzimet administrative, thonë që duhet me i marrë parasysh edhe ndërtesat ekzistuese. E kemi një objekt shumë banesor që ka ndriçim edhe nga ana e këtij objektit. Nuk e di sa ka do të shkojë ky objekt, po distancat, kriteret janë fatkeqësisht nuk janë në terren ata që e shoh nuk janë respektuar.

Kushtrim Veseli, anëtar i kuvendit-tha se nuk doli në foltore për të i'a bërë avokatin askujt, dhe vlerësoi se nuk është në rregull, që një lokali afër objektit që po diskutojmë t'i lejohet të ndërtoj dhe të pajiset me leje ndërtimi, dhe një lokali tjetër të i mohohet kjo e drejtë, sepse kjo po i bie shprehur figurativisht me e shua si biznes dhe me ja devaluuar pronën e tij ndoshta milionëshe. Ai shtoj se në këtë rast është dashur të futet një kriter shtesë, që mos të lejohet të shtohet mbi 450 m², por nuk mund të mos i jepet leja e ndërtimit.

7. Raporti i sistemit të menaxhimit të performancës për vitin 2024.

Ymer Haradinaj, anëtar i kuvendit-tha se, Ministria e Administrimit të Pushtetit Lokal ka publikuar raportin e performancës të komunave i cili përfshin periudhën janar-dhjetor 2024 i cili prezanton rezultatet e komunave në 16 fusha të kompetencave që janë nën përgjegjësitë e tyre përmes 93 treguesve sa ka gjithsej Sistemi për Menaxhimin e Performancës të Komunave. Nga ky raport shihet se komuna e Vushtrrisë është e renditur me një përqindje mesatare prej 73.27% dhe si pasojë e kësaj komuna e Vushtrrisë nuk është përfituese e garantit të performancës për vitin 2024. Raporti analizon dy aspekte kryesore, mënyrën e qeverisjes së komunave sipas legjislacionit në fuqi dhe ofrimin e shërbimeve në aspektin cilësor dhe sasior.

Sa i përket performancës specifike sipas fushave, komuna e Vushtrrisë ka nivel të dobët të performancës në këto fusha: barazia në punësim, shërbimet sociale dhe familjare, zhvillimi ekonomik lokal, përfaqësimi gjinor sipas komunave, infrastruktura rrugore dhe hapësira publike. I kam shkoqitur disa prej tyre, tek barazia në punësim kjo fushë prej dy rezultateve dhe katër treguesve mbulon përfaqësimin e grupeve të ndryshme në punësimin komunal si dhe shërbimet sociale të grupeve më me nevojë në komunë. Në kuadër të punësimit treguesit matin nivelin e punësimit të personave me aftësi të veçanta në institucionet komunale. Në këtë fushë mesatarja e komunave të Kosovës është 58,11% kurse komuna e Vushtrrisë është e renditur nën këtë mesatare me përqindje 44.58. Sa i përket zhvillimit ekonomik lokal, kjo fushë matë aktivitetet e planifikuara dhe të zbatuara për zhvillimin e aktiviteteve në nivel lokal, duke mobilizuar pronat komunale dhe përditësimin e rregullt të regjistrit të tatim paguesve si dhe shkallën e inkasimit të tatimit në pronë. Këtu kemi katër tregues, dy prej të cilëve po i potencoj. Strategjia për Zhvillim Ekonomik Lokal ku komuna e Vushtrrisë është në një nivel të dobët dhe niveli i mbledhjes së faktuarve tatimit në pronë. Edhe këtu komuna e Vushtrrisë prej 100% ose 100 pikëve është e renditur dobët vetëm me 50% ose me 50 pikë. Tek përfaqësimi gjinor mesatarja në Kosovë është 49.77%, kurse komuna e Vushtrrisë edhe këtu nuk është e renditur mirë me 52.06. Treguesit për këtë pikë janë gratë në pozita udhëheqëse në institucionet arsimore, shëndetësore, kulturore, sportive, gratë e emëruara në pozita politike në komunë dhe barazia gjinore tek përbërja e këshillave të fshatrave.

Pika tjetër e kemi te hapësirat publike në bazë të Ligjit për Vetëqeverisje Lokale komunat janë kompetente për ofrimin dhe mirëmbajtjen e të parqeve dhe hapësirave publike. Këtu i kam paraqitur dy tregues sipërfaqe e hapësirave të gjelbëruara që u cekë edhe më herët tek lejet ndërtimore dhe hapësirat publike të pajisura me ndriçim publik. Kur ke dhe më herët fjala për siguri në qytet, duhet të potencojmë se sa më shumë ndriçim publik siguria e qytetarëve është më e madhe. Dhe krejt në fund komuna e Vushtrrisë duhet të angazhohet në zbatimin e plotë të standardeve minimale të konsultimeve publike duke mundësuar pjesëmarrje aktive të qytetarëve në vendimmarrje. Përfshirja më e gjerë e qytetarëve në proceset buxhetore dhe në hartimin e planeve zhvillimore do të kontribuojë drejtpërdrejtë në forcimin e llogaridhënies dhe transparencës. Në këtu po diskutojmë edhe e kemi besimin e qytetarëve edhe për juve të

nderuar asamblistë edhe për qytetarët. Por po e shohim që praktika e kësaj qeverisje lokale po vazhdon, nga fakti se nga 14 Drejtori sa i ka komuna e Vushtrrisë këtu tash e kemi prezent vetëm një. Unë më herët e llogarita se kenë dy drejtorë, dy me 14 i bie që janë vetëm 14% e drejtorëve. Kurse tash e kemi veç një drejtor. Kjo paraqet, diskriminim, nënçmim, përbuzje edhe ndaj qytetarëve ndaj neve si kuvendarë.

Islam Latifi, koordinator i MPK-së në Komunën e Vushtrrisë-pasi i përshëndeti të pranishmit deklaroi: për të pasur më të qartë ju në cilësinë e anëtarëve të kuvendit dhe për të sqaruar dilemat e ngritura në KPF në lidhje me hartuesin e këtij raporti ju njoftojmë se aktin përcjellës për këtë raport për shqyrtim të tij në KPF dhe Kuvend e kemi hartuar në cilësinë e koordinatorit ndërsa Raporti i publikuar i Performancës Komunale për vitin 2024 është shtojcë e aktit përcjellës, i cili raport derivon nga Sistemi Elektronik i menaxhimit të performancës, pra është produkt i punës së zyrtarëve raportues komunal të cilët prej lansimit të thirrjes për raportim nga ana e Departamentit të Performancës në MAPL për 45 ditë rresht vendosin të dhënat e kërkuara duke i shoqëruar ato me dokumentim. Pra raporti gjenerohet dhe përmbledhet nga sistemi apo platforma elektronike. Duke qenë se një prej treguesve të këtij sistemi që i përket fushës së përgjegjshmërisë komunale e që është diskutimi për raportin e performancës komunale për vitin paraprak, në sikurse çdo vit tjetër e kemi sjellë këtë raport për shqyrtim dhe diskutim në këtë seancë, dallimi qëndron vetëm në faktin se ky raport do të duhej të diskutohet para muajit shtator të vitit të kaluar, mirëpo për shkak të vonësive në publikim nga MAPL-ja dhe mbajtjen e zgjedhjeve, ka qenë e pamundur të sjellët në afatin e paraparë me Ligjin për performancën komunale.

Në aspektin sipërfaqësor sa i përket vlerësimit në sistem, është e mjaftueshme që ky raport të jetë pjesë e rendit të ditës për diskutim, pra nuk matë aspektin kohor dhe kualitativ të diskutimit të tij, megjithatë në esencë ka të bëjë me diskutimin e çështjeve apo fushave veç e veç që kanë të bëjnë me ofrimin e shërbimeve ndaj qytetarëve dhe nuk nënkupton apriori kritikën apo kundërshtimin e tij. Ky raport përfshin 16 fusha të kompetencave komunale dhe 93 tregues matës, duke ofruar një pasqyrë të qartë mbi mënyrën e qeverisjes, nivelin e zbatimit të ligjit dhe cilësinë e shërbimeve që u ofrojmë qytetarëve. Sipas vlerësimit dhe përmbledhjes së vlerave apo përqindjeve, Vushtri ka arritur një performancë mesatare prej 73.27%, duke u renditur mbi mesataren e komunave të Kosovës. Ky rezultat është një dëshmi e angazhimit të administratës komunale, e bashkëpunimit institucional dhe e përkushtimit për të përmirësuar vazhdimisht këto shërbime. Megjithatë, ky raport nuk duhet të shihet vetëm si një arritje statistikore, nuk ka për qëllim vetëm renditjen e komunave, por rritjen e përgjegjshmërisë dhe transparencës ndaj qytetarëve. Ai është një pasqyrë reale e punës sonë na ndihmon të kuptojmë ku qëndrojmë dhe ku duhet të përmirësohemi pra një udhërrëfyes për hapat e ardhshëm. Raporti thekson dhe rekomandon disa fusha ku kërkohet angazhim shtesë, ndër to:

- Rritja e përfshirjes së personave me nevoja të veçanta;
- Përmirësimi i infrastrukturës së kanalizimit dhe trajtimit të ujërave të zeza;
- Zbatimi më efektiv i lejeve mjedisore;
- Hartimi dhe zbatimi i dokumenteve strategjike komunale, si Harta Zonale, Plani Operativ Emergjent Lokal, Strategjia për Zhvillim Ekonomik Lokal, Plani për menaxhim të integruar të mbeturinave, Plani i Mobilitetit (në proces).
- Rritja e pjesëmarrjes së qytetarëve në proceset vendimmarrëse;
- Adresimi më i plotë i rekomandimeve të Zyrës Kombëtare të Auditorit;
- Rritja e inkasimit për menaxhimin e mbeturinave.

Këto rekomandime nuk janë kritika, por mundësi për përmirësim. Ato na obligojnë që të reflektojmë me seriozitet dhe të ndërmarim masa konkrete, të planifikuara dhe të matshme. Është me rëndësi që ky Kuvend ta trajtojë këtë raport jo vetëm si dokument informues, por si bazë për:

- Rishikimin e prioriteteve buxhetore;
- Forcimin e mekanizmave të mbikëqyrjes;
- Rritjen e transparencës institucionale;
- Thellimin e bashkëpunimit me qytetarët.

Rezultati prej 73.27% është një bazë e mirë, por synimi ynë duhet të jetë avancimi i mëtejshëm, duke synuar standarde edhe më të larta në vitet në vijim. Në fund, dua të theksoj se performanca komunale është përgjegjësi e përbashkët – e ekzekutivit, e këtij Kuvendi dhe e çdo zyrtari publik. Vetëm përmes bashkëpunimit institucional dhe vendimmarrjes së përgjegjshme mund të sigurojmë zhvillim të qëndrueshëm dhe shërbime më të mira për qytetarët tanë. Ju faleminderit për vëmendjen.

8. Raporti për zbatimin e Planit të Integritetit për vitin 2025.

9. Pyetje dhe përgjigje:

Ymer Haradinaj, anëtar i kuvendit-duke ju referuar seancën të Kuvendit të Kosovës që është mbajtur me datën 21 shkurt ku është aprovuar buxheti i Republikës së Kosovës nga Ministri i Financave është thënë që 11 komuna të Republikës së Kosovës nuk e kanë dërguar me kohë nuk i kanë miratuar buxhetet komunale me kohë mirëpo mbas takimeve që atje kanë pasur dy komuna pastaj janë përfshirë në buxhetin e Republikës. E kemi parë që është përfshirë komuna e Prishtinës edhe komuna e Shtimes dhe kanë mbetur edhe nëntë komuna. Pyetja ime për kryetarin e komunës është, pra ka mbetur nën komuna pa përfshirë në buxhetin e republikës. Pyetja ime është a është e përfshirë Komuna e Vushtrrisë në buxhetin që është miratuar në Kuvendin e Republikës apo Vushtrria është në mesin e atyre nëntë komunave të cilat kanë mbetur pa u përfshi në buxhetin e Republikës së Kosovës dhe kjo pastaj do të jetë shumë problematike për realizimin edhe të investimeve kapitale dhe punëve të tjera të cilat janë në komunë.


Abit Abiti, ZKF- sqaroi se komuna e Vushtrrisë e ka dorëzuar buxhetin e saj në pajtim me nenin 62 pika tretë të Ligjit të Financave Publike, d.m.th. para miratimit të buxhetit në Kuvendin e Republikës së Kosovës edhe ata Ministria e Financave kanë qenë e obliguar që me të bë pjesë të Ligjit të Buxhetit edhe vendimin e buxhetit edhe tabelat e buxhetit të komunës të Vushtrrisë. Unë këtë informacion e kam marrë të mirëqenë që e kemi dorëzuar me kohë buxhetin domethënë para miratimit në Kuvendin e Kosovës. Mirëpo tash do të interesohem a është ajo veç që ka thënë ministri se ne me domethënë e kemi dorëzuar shumë më herët para aprovimit në Kuvendin e Kosovës.

Ramadan Parduzi, anëtar i kuvendit- parashtroj disa pyetje dhe atë si në vijim: Kam informata që tri ekipe njëra është në Super Ligen e Kosovës dhe dy ekipe të tjera në Ligën e parë që janë duke u tërhequr nga garat, dhe arsyeja është mjete financiare. A ka mjete financiare të mjaftueshme për vitet 2026 dhe 2027 komuna e Vushtrrisë konkretisht Drejtoria për Kulturë, Rini dhe së Sport, për t'i financuar dhe për të i' u dalë në ndihmë sa do pak këtyre klubeve?

Pastaj edhe njëherë ju drejtua Drejtoreshës të Arsimit se po merret shumë me ligj e ligjin e ka vetë në dorë, te Drejtoria e Arsimit ku së paku deri 10-të drejtorë janë duke u sjellë nëpër oborre të shkollës e të cilët i kanë kryer nga dy mandate dhe ende nuk po zbatohet ligji që të tërheqin nga pozitat që i kanë përfunduar realisht. Prandaj pyetja është se kur do të ndërmerren masa për zbatimin e ligjit për t'i liruar pozita e përfunduar këta drejtorë dhe kur do të vendosen drejtorët e rinj në baza ligjore? Po ashtu ka disa drejtor në disa shkolla të cilët po vendosen në pozita pa u shpallur fare konkursi. Një pyetje tjetër për DKA-në është se kemi afër 50 mësimdhënës që nuk janë në listat e pagave, cilat veprime i keni ndërmarrë për këto raste? Për Drejtorin e Shërbimeve Publike pyeti se përse në rrugën "Fazli Shabani" e gjithë rruga është e ndriçuar, ndërsa tek familja Kutllovci, është e vetmja shtëpi që nuk ka ndriçim publik?


Mbledhja përfundoj në ora 12:30

Bastri Duraku


Procesmbajtës



Melihate Basholli-Latifi


Kryesuese e Kuvendit